



[Blank piece of aged paper]

1 - 14

A. I. 14.

SCINTILLÆ  
IGNATIANÆ,  
SIVE  
SANCTI  
IGNATII  
DE  
LOYOLA,  
SOCIETATIS JESU  
FUNDATORIS  
APOPTHEGMATA

*V. E.* SACRA, *Mont. Argent.*

Per singulos Anni Dies distributa,

*Et ulteriori Considerat. proposita.*



*Impressa primum Vienna 1705.*

*Reimpressa Wratislaviæ Typis Acade-  
micis 1757.*

PIO USUI,

AC FRUCTUI

DOMINORUM DOMINORUM

CONSODALIIUM

ALMÆ

CONGREGATIONIS LATINÆ

MAJORIS

BEATISSIMÆ VIRGINIS

MARIÆ,

AB ARCH-ANGELO

SATUTATÆ

IN ACADEMICO SOCIET. JESU

COLLEGIO. WRA'TISLAVIÆ ERE-

CTÆ DICATUS,

*Et in strenam Anni Ære Christianæ.*

*MDCCLVIII. oblatus.*



3

D I V O  
P A T R I A R C H Æ  
I G N A T I O .

✠ S ANCTISSIME PATER, *Magne  
✠ Ignis! qui Divinæ charitatis ardo-  
✠ re succensus ita vehementer exarsisti, ut Or-  
✠ bis totus flammis tuis nutriendis nimium  
quàm angustus fuerit; nec ardere contentus  
ipse, hunc omnium actionum, & cogitatio-  
num tuarum scopum præfixisti, qui eo, quo  
ipse tam sanctè flagrabas igne, totus, qua  
qua patet. Orbis inflammaretur. Huc con-  
tinua per orationem, & ardentissima suspi-  
ria cum Deo communicatio; huc plurima,  
quæ per Italiam, Galliam, Hispaniam, Ter-  
ram sanctam suscepisti, itinera; huc denique  
cura, vigiliæ, studia, conatus omnis, imò om-  
nis in venis motus, anhelitus omnis collima-  
bat, ut prodesse omnibus, omnes hausto è cæ-*



lis igne succenderes, nec esset, qui à calore  
 Tuò se posset abscondere. Quo non pertinge-  
 bas corpore, ut adesses ardoris Tui efficacia,  
 socios velut incendiarios totidem zelantissi-  
 mæ doctrinæ Tuæ rædis instructos ità latè  
 ultro citroque divisisti, ut non superesset in  
 Orbe natio, non provincia, imò vix angu-  
 lus aliquis, quò calorìs Tui fructus non pene-  
 traret, nonque plurima in salutem Gentium  
 operaretur. Tunc solùm beatus, & hilaris,  
 si quod per Te, perque Tuos Dei gloria, pro-  
 ximi que salus, ac perfectio ullibi sumeret  
 incrementum. Ut autem etiam in dissitum  
 operareris, quot verba, tot flammæ eructa-  
 re non contentus, nova in distans moliturus  
 incendia, ut etiam, cum non superesses, ignis  
 quasi perpetuus, viveres, libros, & epistolas,  
 id est: totidem ignes missiles, ad varios di-  
 spersisti, ut, dum illæ subirent oculos, undè  
 Dei charitas, & sanctioris vitæ desideria pe-  
 ctus occuparent. Quod sanè ad eò feliciter  
 obtinuisti, ut nec Tu videri sine fructu, nec  
 audiri absque emolumento posses, nec Tui,  
 quos chartæ committebas, characteres lege-  
 rentur, quin luceres in omnibus, & arderes,  
 tuisque flammis accenderes universos. Mei  
 hic me unius pudet, MAGNE PATER! si  
 hoc Te tamen nomine compellare mihi lice-  
 at, qui cum Ignis filius esse deberem, fumus  
 sum, tuisque degener à caloribus, heu! quàm  
 pro-



procul à moribus discedo, quem tam ardentibus ad imitationem exemplis provocasti, tam vehementibus igneæ legis Tuæ flammis tam diu fovisti, tam frigidus tamen adhuc, & obscurus titio persevero! & hoc est, cur Sacra Tua cælestis sapientiæ Apophthegmata, id est, saluberrimas doctrinas, ex ardentissimo Tuæ in Deum, & proximum charitatis ardore, velut clibano cadentes scintillas, in libellum, velut focum, congesi, eo nempe consilio; ut semper ad manum esset, unde frigori meo excutiendo remedium ponerem, unde ignavia mea ad æmulandos ignes Tuos velut flabro salutari animaretur identidem, veternoque tandem posito in meditatione mea exardeſceret ignis, quàm mihi necessarius, tam tibi acceptus. Quem conatum licet privato ego solum usui destinaverim, fuere tamen, qui publici eum juris esse voluerunt, tum ut Tui, **PATER ARDENTIS-SIME!** caloris fructus propagaretur latius, tum, ut aliis serviendi desiderio, Tua vota complerentur uberius. Quorum monitis obtemperans, Scintillas has ex amplissimo pectoris Tui incendio sumptas, per manus & oculos mitto, ut novos inde Spiritus calores participent universi, quas tamen nisi Tu fovere, ac in flammam promovere velis, hærebunt inefficaces, imò infertiles resolutæ cineres, vim, ardoremque omnem amittent. Tu proinde,



PATER AMANTISSIME! *qui non minus nunc in caelis ardes, quam olim in vivis agens, Dei Gloriam, ac proximi salutem anhelasti, Scintillis his, id est, doctrinis ex ore, & clamore Tuo desumptis ignitum illud robur adde, ut, quod Tuis olim Sociis, idem Tuus hodie doctrinis dictum velis; Ite, & mundum accendite universum, Dei nempe & proximi charitate, quod omnibus quidem, quorum illa oculos subiverint, mihi tamen, utpote reliquis magis indige, cumprimis supplico.*

Filiorum Tuorum indignissimus G. H.



Ignem veni mittere in terram, & quid volo, nisi ut accendatur. *Luce c. 12. v. 49.*





## I. JANUARI.

OMNIA AD MAJOREM DEI GLORIAM!

*Hæc, & his æqui valentia verba trecentis septuaginta sex vicibus repetit in suis Constitutionibus S. P. Ignatius. Suar. tom. 4. de Relig. lib. 8. c. 6. n. 1.*

**N**ovi anni, & totius vitæ felicitas in eo consistit, ut omnia temporis, & actionum nostrarum momenta ad Dei solius gloriam dirigantur. Hoc Deus jure supremi Domini exigit; hoc nos essentiali servitutis titulo debemus.

Qui suam, non Dei, gloriam quærit, fur est, & latro: nam soli Deo gloria, nobis autem confusio debetur & opprobrium. Illa debiti nostri & calcar est, & tessera.

Nemo sibi pejus consulit, eo, qui suam, Divinæ gloriæ anteponebat; hic enim temporalem simul perdit, & æternam: semper miser; hic, quia vera; illic, quia omni destituitur.

Quod ipsi, sed nimiùm serò, fatebuntur: Tota nocte laborantes, nihil cepimus. Nihilum hoc, est humana gloria, ut flos sceni caput attollit, & brevi conculcabitur; ut fumus exaltatur, & perit. Si gloriam æstimas, veram quære.

## II. JANUARI.

*Hæc prima sit agendorum regula: sic Deo fide, quasi rerum successus omnis à te, nihil à Deo penderet: ita tamen iis operam omnem admove, quasi tu nihil, Deus omnia solus sit factururus. S. Ignat. ap. Nolarci.*

**I**nfirmas spes imbecilli stat pede, quæ manibus destituitur. Qui te, cum needum es, creavit sinè te, nunc nec salvabit, nec iuvabit te, sinè te.

Præbe tu scintillam, Deus animabit incendium. Jace sementem, ille dabit incrementum. Sic è voto crescent omnia, secus omnia sterilefcunt.

Tu nihil potes, licet velis, sinè Deo. Ille nihil vult, esto possit, sinè te. Fœderatus Deo poteris omnia.

Gratia Dei, quæ tanta in aliis potuit, in te uno non amittet vires, modò tu in eum fiduciam non amittas. Ubi sunt spes tuæ?

## III. JANUARI.

*Oleum perdit & operam, qui aliorum mores emendaturus non incipit à se ipso. S. Ignat. apud Barto. l. 4. §. 36.*

Præ.

**P**Ræpostera planè res! alios volumus bonos, cum ipsi non simus; ex ore nostro condemnandi, cum bona præcipimus, & mala agimus.

Nulla lex satis est efficax, nisi viva, quam legislator gestu promulgat. Efficacior quippe vox est operis, quam oris. Illa tot fœderatos habet ad persuadendum oratores, quot actiones; Hæc sola cum sit, authoritate destituitur.

Quis ibi fructus, dum ædificamus simul, & destruimus? Illud verbo, istud opere. Qui malè affectis vult mederi, non subsit affectibus. Prius est sibi cavisse, quam aliis.

Miseri mortales! domi talpæ, foris linceus. Non videmus, quid à tergo sit manticæ. Sensum omnem amisimus non sentimus trabem in oculo, dum in alieno festucam scrupulosè scrutamur. Medice, cura te ipsum.

## IV. JANUARI.

*Immutat mores cæli mutatio; nisi se imperfectus deserat, vix erit alibi, quam isthic melior.* S. Ignat. apud Bart. l. 4. §. 36.

**N**ullum vidi, qui melior ex peregrinatione redierit. Multum illa curiositatis, parum habet utilitatis.

Qui malè agit, nullam agit bonam fugam; ubi tutum se crediderit, erit in se, quod timeat.

Corporis morbos perquam rarò, animi

nunquam, emendat clima. Intrà te si malum est, hoc fuge, vel in exilium mitte; tuum, & non loci, vitium est, quod fatigat. Non hujus, sed tui, mutatione curari debet.

Illud appetendum esset iter, quò vel dæmon sequi, vel passio tua venire non posset; quod frustra alibi quæres, nisi à vitio ad virtutem iveris. Hæc una est malo tuo medicina.

Locus nullum fecit sanctum. Non Jerosolymis fuisse, verùm Jerosolymis bene vixisse laudabile est. Certum instabilis sui que victoriam fugientis animi signum est; de loco ad locum petere mutationem.

#### V. JANUARI.

*Juvenum virtuti periculosa negotia perpetuam creduntur.* S. Ignat. apud Bart. lib.

4. §. 37.

**N**ovitia virtus instar florum est in arboribus, qui ad primos veris calores se celeres protrudunt, sed fluxi adeò, ut penè contactu, vel etiam solo rigidioris auræ afflatu, exarescant.

Teneri humeri sub gravi pondere facile fatiscunt, & turpi ruina produnt inconsultos conatus. Vigor sanguinis audaces facit, sed audacia, nisi rationis fræno contineatur, abit in temeritatem.

Præcox fervor vires atterit, unde fit, ut asinus lassus tandem quærat diverticula, qui,  
fi

si adfuisset moderatio, diu bonas operas præstitisset, sic primâ spes perit in herba.

Inconstantia, & mutabilitas cognatum est homini malum, sed juventuti proprium. Si quid hæc amat, desiderat vehementer, sed non diu.

Festina lente: rara est celeritatis una, & constantiæ prærogativa. Errat facile, qui nimium properat. Procul iturus ita principio passum temperet, ut durare possit.

## VI. JANUARI.

*Rarum aliquod, & eximium facinus sexcentis vulgaribus longissime antecellit. S. Ig. apud Bart. l. 4. §. 17.*

**U**T res obviæ, quæ ad manum sunt, & facile passim occurrunt, nec sui desiderium, ut obtineantur, nec obtentæ solatium, creant: ita opera vulgaria numerum, non pretium, faciunt.

In arduo virtus coronam constituit. Eo frustra segnis aspirat, quo nullus eluctabitur, nisi, quem insignis rei gerendæ difficultas manu duxerit. Aude aliquid. Nihil invium est animo forti.

Ponderat Deus, non numerat opera; reni, non censum, attendit. Vide, quid ei offeras? & memento: tuo, ut supremo rerum omnium, Domino, rara, exquisita, & plane insignia esse debere, quæ offerri mereantur.

Nec utilitatem aut paupertatem tuam cau-

sare: locuples est Dei gratia, cujus auxilio mira potes, modo adfit conatus, & fervor non deficiat.

## VII. JANUARI.

*Unusquisque persuasum habeat: tantum se in spiritualibus profecturum, quantum ab amore sui, & commodi proprii affectione sese subtraxerit. S. Ignat. apud Bart. l. 4. §. 22.*

**N**emo potest duobus Dominis servire, unum ex iis odio habebit, & alterum diligit. Cor divisum esse non potest. Partem Deus non accipit, si eam terrena gravent & inficiant.

Hæc unica corporis nostri causa est, quod ita diligamus Deum, ut nosmetipsos non omnino aspernemur, hoc est: partem in utramque claudicamus, & ideo tam lento, tamque incerto pede ad æternorum amorem assurgimus.

Ut ovum a sole non attrahitur in sublimem, nisi vacuum; nec lignum flammam concipit, quamdiu est madidum; ita, quo minus anima corporalibus adhæret, eo rationis, divinarumque capacior, & magis sua est.

Irrationalis, brutusque appetitus quamdiu penitus extinctus non est, semper adversus rationem, & sanctiores affectus insurgit, & nativo pondere ad ima retrahit. Resolutione opus est, ut ex toto in spiritualem convertatur.

## VIII. JANUARI.

*Non potest fieri quid dignum Deo, quin vel mundus tumultuetur, vel infernus turbas cieat* S. Ignat apud Nolar.

**S**emper infestæ luci sunt tenebræ, nec bonos inter & malos firma coalescit amicitia. Ut vermis fructus magis maturos, ita malitia eos plerumque arrodit acerbius, qui meliores.

Certum bonitatis indicium est, malis displicuisse; vituperium foret à talibus amari, & commendari. Nihil pensi habe, si de te ii loquantur malè, qui nihil faciunt bene.

Nec censeri debet malum, unde meliores sumus. Cos ista virtutis est. Non parum juvant mali probos, dum persequuntur; augment patientiam, merita cumulant.

Quid times? nec mundus, nec infernus totus quidquam in te possunt! ubi plura sunt obstacula, ibi abundantior est DEI gratia. Tu contra audentior ito. Victoriæ occasionem arripe, Triumpho materia est. Hic fortitudo tua campum nacta est, quæ sine hoste in gloria latuisset.

## IX. JANUARI.

*Multò ardentius insistendum homini interiori domando, quàm corpori, & frangendis animi motibus, quàm ossibus.* S. Ignat. apud Bart. l. 4. §. 12.

**I**Neruditum vulgus, quod ultra corticem nihil videt, nec medullam attendit, ab externo, qui sub oculos cadit, rigore metitur sanctitatem: quasi verò sub fune, sub tege, te arrogans mens latere non possit. Quid iuvat abstinere à carnibus, & famam alienam arrodere?

Quod Deo placet, internum est: externa, nisi vim ab interno accipiant, Deum non movent. Illa plus arrogantiae habent, ista plus meriti. Cædes bonum, vel corporis laniena, quid meretur? si passio vivat.

Satis corpori provides, si animo bene sit consultum. Non ex corpore bono bonus animus, sed ex bono animo bonum corpus redditur. Plurimum in corpus animus potest.

Illud bonum tibi cupio, quod mihi, nempe internum. Hoc sanè non vulgi opinio, non rigor apparens, sed animi ad rectæ rationis regulam compositi tranquillitas facit. Intus bonum habitat, frustra foris quaeritur. Qui solidæ sunt virtutis, plus habent saburra, quàm veli.

#### X. JANUARIII.

*Liberalis est Deus, è manibus illius accipio, quæ non invenio in manibus hominum, si nihil hi dederint, accepturus sum à Deo omnia. S. Ignat. vitæ l. 4. § 23.*

**A**ngusta est hominum liberalitas, modicum est omne, quod habent, quod ipsum,



sum, si largiendo diviserint, minùs remanebit. Unicus Dei thesaurus inexhaustus est, plurima dando, nihil imminuitur. Huc ergo spes!

Spes nostras Deus vincit beneficiis. Solemus sperare plùs, quàm possideamus, optare verò ampliùs, quàm speremus. Tot autem nobis beneficia pollicetur Deus, ut nemo minùs sperare possit, quàm optare.

Tot syngraphas Divinæ liberalitatis, quot spes, quot vota, habemus, quidquid petitis, credite, quia accipietis. Vide, quàm facilè sit divitem fieri.

Nec minùs dat, quàm promiserit. Verba enim amantis, opera sunt: lingua beneficentiæ, manus. Faciliùs liberali est dare, quàm negare. Cur pauca petimus?

### XI. JANUARI

*Proprium Divinæ bonitati est ea solertius defendere, quæ à Diabolo acriùs oppugnantur.* S. Ignat. in Hist. Soc. P. I. lib. 9.

**D**EUS totus oculus est, in nostra commoda semper vigil; Et sicut Dux magni exercitus, eò suppetias mittit, ubi validior instat inimicus.

Felix pugna, ubi de succursu dubitare non licet; quam nec nervi, nec annonæ, nec ullus mediorum defectus moratur. Quid diffidat, qui Omnipotentem habet fœderatum?

Causam Deus suam non destituet. Si nos

ab

ab orco premimur, ille à nobis impetitur; ideo tam prona in nostri defensionem mittit subsidia, modò nos iis uti, non negligamus.

Fortis, & mille fraudum artifex hostis est, qui te oppugnat, cave solus cum eo congregi. Si tibi fides? jam victus es. Si Deum in suppetias voces, omnes ejus artes securus ridebis.

## XII. JANUARI.

*Nisi charitati, & humanitati comes eat veritas, jam nec charitas, nec humanitas fuerit, sed fraus, & vanitas.* S. Ignat. apud Bart. l. 4. fol. 381.

**H**ostis apertus minùs nocet, quàm fictus amicus; illum medioeri diligentia facile quis cavebit, hunc nullâ satis. Qui sva- vi quadam eloquentia cordis tui intima subit, quàm certa, tam grandia tibi vulnera infligere potest.

Oculata debet esse conversatio, sed magis amicitia. Diu delige, priusquam diligas. Sæpe sub læto gramine serpens latet. ~~Ecce,~~ sed cui? vide.

Nemo sapiùs decipitur, quàm qui verbis credit. Sæpe cor felle plenum mellea verba eructat. Scypho nempe aureo venenum propinari potest, ut avidius hauriatur. Sic dulci fistula volucrem auceps decipit.

Nullus Deo sincerior est amicus: Verba vitæ, & veritatis æternæ habet; Huic soli te, tua, tutè confides.

## XIII. JANUARI.

*Quantò arctius se quis Deo astrinxerit, & liberaliorem erga summam Majestatem præstiterit, tantò eum in se liberaliorem experietur.* S. Ignat. Con. p. 3. n. 1.

**N**on perit, quod Deo datur; quo liberalius terra vapores ad cælum mittit, tantò uberiores inde imbres recipit, quibus fœcundetur: imò, si terra bona centesimo fructu reddit sementem, quam accepit, nunquid aut sterilior, aut illiberalior erit creator suâ creaturâ?

Liberalitas hæc quæstuosissima est; quo plus largiris, tantò plus habes. Sic sanè perdere, lucrum est. Servare avaritia est sordidissima.

Accipit Deus modica, reddit plurima, pro momentaneis æterna, pro perituris semper duratura, divina pro creatis refundit. Sed dat pro te. Hic sanè census omnem explere cupiditatem potest. Quid adhuc moramur, nos, & nostra, Deo dare?

Illud atende: parte contentus non est, totum, quod habes, imò quod es, exigit Deus. Da; tua non das; qui dedit omnia, repetit omnia. Cur ex alieno illiberales simus?

## XIV. JANUARI.

*Ille Religiosi nomen implere se credat, qui integre non solùm à sæculo liber fuerit, sed etiam à se ipso.* S. Ignat. vitæ l. 3. §. 38.

O ma-

**O** Magnum Religiosi nomen! grandis prærogativa! cui tot privilegia principes, tot præmia Deus præparavit! sed ut nomen hoc impleatur, multa, eaque minimè vulgaria exigit.

Ingens Religiosorum est copia, si numerentur, fortè non ità grandis, si ponderentur. Si testimonium, & fidem vestis faciat, innumeri, si sola facta, ut decet, vocem inveniant, utinam plures!

Magnum quidem est, & suâ laude dignum: Christi amore res, & spes generoso pede conculcasse: verùm nisi se ipsum cum omnibus concupiscentiis suis reliquerit. Mundum in Religione quærit.

Quid juvat Christum sequi, si non detur consequi; qui vult venire post illum, abneget semetipsum. Omni affectu vacuum te vult Deus, si vel modico teneris, actum est. Partem in utramque claudicabis, veste religiosus, mente sæcularis.

#### XV. JANUARIIL.

*O mi Deus! si te nõssent homines! S. Ignat. vitæ l. 4. c. 28.*

**O**mnis homo naturaliter scire desiderat; hinc tanta in multis studiorum aviditas, ut præ rerum cognitione opes contempserint, & honores. Sed ô vana mortalium studia, ut quid diligitis vanitatem, & quæritis mendacium! Sapientia hujus mundi stultitia est

est apud Deum, si ea non ad unius Dei cognitionem dirigatur.

Frustra fatigamur, ætatem terimus, quantum discimus, tantum, & amplius ignoramus; tenebras, non lucem, adepturi, donec in Dei cognitione, & qui inde sequitur, amore verè, solidèque docti esse conemur.

Nec ingenti hic acumine, nec subtili Magistro, nec grandi opus est Bibliotheca; sine verborum strepitu, in humili silentio, & solitudine cordis, hæc Dei cognitio discitur; abscondit hanc à sapientibus Deus, ac revelat parvulis.

Quid beatos in cælo facit, nisi Dei cognitio? vide quàm facilè beati esse possimus? discite modum: Beati mundo corde, quoniam ipsi Deum videbunt.

## XVI. JANUARI.

*Vanitas, & inanis gloriæ vitium ex ignorantia, & cæco sui amore, nascitur. S. Ignat. vitæ. l. 4. c. 4*

**C**omune mundi malum, ambitio, à primis parentibus, divinitatem ambientibus, ad nos usque traducta! Hæc, si assentatoris alicujus elogiò, velut brachiò fulciatur, quàm altè, Deum bonum! affurgit.

Sui æstimatio, credula facilè est, non tantum quæ sunt, sed & quæ non sunt, credit, modò in sui commendationem dicta sint.

Infelices vanitatis aucupes! dici, & habe-

ri avent, quod non sunt. Amant nempe decipi, & in erroribus exultant. Quanta hæc cæcitas à fumo gloriæ causata!

Profundius te inspice, quis sis? quod ut scias, Deum cogita; tantum siquidem decreset ambitio, quantum increverit Dei cognitio. O Domine, noverim me, & noverim te!

XVII. JANUARI.

*Relinquere Deum propter Deum, magnum lucri spiritualis compendium est, nullum dispendium.* S. Ignat apud Bart. l. 4. §. 37.

**A**D propria commoda, lucra etiam spiritualia, cæcus esse debet verus amor; irretortò hic oculò amati unius placitum respicit; aliàs nos, non Deum, amaremus; non donaremus, sed commutaremus, mercenarii, non filii.

Solatia etiam spiritualia, si nostra sunt, suspecta sint. Tantò plus opus aliquod securitatis, quantò minùs propriæ voluntatis habet. Hanc, etiam sanctam, si deserat propter Deum, sanctiorem implebis.

Non sola nos oratio Deo conjungit; nec illud semper optimum, quod maximum. Illud sanctissimum, quod voluntati Dei magis vicinum.

Si pro domo, ex Dei amore, deserta hinc centuplum, & ibi vitam æternam pollicetur Deus, quid ei daturus est, qui Deum deserit propter Deum? qui plura dat, plura recipiet.

XVIII.

## XVIII. JANUARIII.

*Ad quem virtutis gradum piger per multos annos non potest pervenire, eò modicâ temporis intercapedine diligens mirabiliter volat. S. Ignat. in epist. de perfect.*

**U**na dies ferventium plus facit, quàm tepidorum longissima ætas, imò una hora behe acta etiam immortalitati otiosorum præferenda. Frustra vivit, qui bene non vivit.

Desidia in spiritu est mors superstes, vigil sopor; nam vacua est vita, quam non implet cura bene vivendi. Tales, cùm dormierint somnum suum, nihil inveniunt in manibus suis

Sacra res tempus est, tantùm valet quantum æternitas. Hanc ut beatam obtineas, agendum est, ne sinè fructu vita, sinè bonorum operum fervore, dies elabatur.

Arbore fructus, ab agro segetem expectas, cùm fructum tui contemnis? Esto tui usufructuarius; tu tuimet pretiosus fundus es, ferax prædium, & qui desideras à tuis fructus, prius à te ipso exige.

## XIX. JANUARIII.

*Intolerabilis tum mihi vita foret, si quid in anima mea humanum, & non omni ex parte divinum latere, comperirem. S. Ignat. vitæ l. 4. §. 5.*

**B**onum ex integra causa, malum ex quo-  
vis defectu. Felix non eris, nisi aut  
omnia contempseris, aut omnia habueris.  
Delicata felicitas est: miser es, si aliquid de-  
sit. Nullâ hoc arte facilius obtinebis, quam  
Deum solum amando.

Qui semel gustavit, quid sit Deus, facilè  
fastidit alia omnia; torrente illo voluptatis  
satur, nauseat super cibo omni levissimo,  
quod creatum est.

Ceu plumula, vel unâ guttulâ gravis, as-  
furgere non potest, & licèt impetu in sublime  
attollatur, nativo tamen pondere in terram  
relabetur; sic anima, vel modico affectu ter-  
reno affixa, ad cœlum volare nequit.

Totus, quantus es Dei, & à Deo es. Si  
non totum reddis Deo, injuriosus es; Dividi  
non potest amor tuus, totus Deo debitus, &  
si totum des, in multis debitor manes! Quid  
si partem alio derivares?

XX. JANUARI.

*Non tantùm Dei habenda est ratio, sed eti-  
am hominum, propter Deum. S. Ignat. vi-  
tæ l. 3. n. 27.*

**Q**ui sic amavit hominem Deus, ut se pro  
ejus amore immolaret, sic vult se ama-  
ri ab homine, ut homo non negligatur. Ni-  
hil amoris divini detrahit, qui proximum,  
propter Deum, diligit

Nemo tam vilis est, qui non, quod amari



& æstimari possit, habeat, & si hæc deficerent quia res Dei, pretium sanguinis Christi, & imago divinitatis est, amor ei sine scelerare negari non potest.

Si tuos, & nullius præterea, manes attendas, erit sanè, ut omnes te meliores credas, & uberem odii tui; & amoris proximi causam, nanciscaris.

Non hominum malitia facit, ut minus proximum amemus: nostra passio & antipathia est. Hanc vario colore vestimus, quia nostra nos dedecora manifestare pudet.

## XXI. JANUARI.

*Si fieri posset, ut amans Deum absque sua culpa damnaretur, facilius pœnas omnes inferni toleraret, quàm blasphemias, quibus damnati Deum execrantur, audiret. S.*

Ignat. apud Bart. l. 2 § 27.

**P**Oena sensus mala non est, utpote quam decernit Deus, imo bona: quia peccati poena divinx justitia instrumentum est: blasphemiam autem non potest non odisse Deus, &, qui Dei amator est, homo.

Amato injuriam irrogari vulnus amanti tantò est magis intolerabile, quantò vehementiùs amat; cum nec illam tueri possit, nec vindicare, his infelix: & in se patitur, & in amato.

Qui se, ut debet, odit, illi pati durum non est; dum enim plectitur inimicus, quid hostis  
egre

ægrè ferat? aut cum eo affligi, quem amat, est pati sinè remedio.

Innocentem pati videre, difficilè est, difficilius benefactorem, & quid esset, nisi difficillimum, audire Deum, id est, omne bonum, bonum infinitum & immensum pati?

XXII JANUARIÏ.

*Ità homo quandoque patitur à diabolo, ut de mentis exiisse potestate videatur: indè fit: interdum naturæ adscribi, morbo nunquam, quod tentationi esset adscribendum. S. Ignat. in reg. de discret. spir.*

**S**ubtilior dæmon est, quàm ut artes ejus ab obviis nosci possint. Princeps tenebrarum cum sit, ut securius lateat, in abdito cudit technas; altiori hic opus lumine, quàm humanò.

Ut arcem oppugnaturus externa prius opera demolitur, sic strategus infernalis, dum animam quærit, corpus aggreditur. Time cuniculos: nimia securitas maximum periculum est.

Corpus impetit, ut animæ noceat: maniam simulat, ut bonorum operum interruptionem impetret. Ità solers in damna nostra, ut, si maxima nequeat, aliqua tamen inferre gaudeat. O si nos in lucra spiritûs tam avidi viveremus!

Permittit animæ hosti hanc potestatem Deus, vel ut humilitati nostræ consulat, vel ut suum

suum in nos dominium exerceat; ità dum  
dæmon tyrannum agit, Deus manet Pater.

## XXIII. JANUARI.

*Plus plerumque latet periculi, in minimis pec-  
catis contemnendis, quàm in maximis. S.*

Ignat. apud Ribaden. l. 5. c. 7.

**N**ihil parvum est, seu bona, seu mala at-  
tendas, cum utraque sint æterna. Sem-  
per quippe verum manebit: hoc bene, aut  
perperam factum fuisse; ità nihil non ad æ-  
ternitatem facit, felicem, vel infelicem.

Qui vitia temnit, eò, quòd modica sint,  
quod viatorem tenuis etiam scrupulus mo-  
rari possit, expertus non est. Tenue filum  
fat est, nè, quod vellet, nubibus se avis in-  
ferat.

Mala grandia facilè patent, & vel ipsa mo-  
le sua terrent, ut quæraturo malo medicina:  
minuta latent, & contempta crescunt, donec  
evadant incurabilia.

Non quid, sed cui agamus? attendendum,  
Magnus est Deus, nihil est parvum, tanto di-  
splicuisse. Nulla est actio tam pusilla bene,  
vel malè facta, quæ non excedat gravissima  
Reipublicæ, imò Orbis universi vel conden-  
di, vel evertendi negotia. Vide, quàm ma-  
gnus error, parva neglexisse.

## XXIV. JANUARI.

*Nibil diu præponderat veritati; oppugnari quidem potest, expugnari non potest. S. Ignat. apud Nolarci.*

**O**ptimus colorum candor est. Fraus & dolus nulli patrocinator; ut nive solis radiis decocta sordium acervus, qui diu latuerat, apparet; sic à veritate, pulsus fraudibus, doli deteguntur.

Ut sol nebulis tectus latet quidem, ast has tandem decoquit, & puriori luce serenior aspicitur: ità pressa licet aliquamdiu abscondatur veritas, erumpit tandem.

Optima Politica sinceritas est. Alba mens nunquam erubescit, ubi vice versa in ruborem cogitur deprehensa falsitas. Nihil fædius, fraude detectâ.

Verfipellis se prius fallit, quàm alios; dum enim alteri parat foveam, ipse prior in eam incidit. Justa pœna Talionis est, ut iisdem machinis obruatur iniquitas, quas aliis intendendis destinavit. Qui ambulat simpliciter, ambulat confidenter.

## XXV. JANUARI.

*Diabolus, cum adoriri quempiam, exagitare que infestius cupit, nocturnum tempus maxime observat. S. Ignat. in Exercit*

**I**llud vigiliam inter & somnum quasi crepusculum, ut dubiæ lucis, ità dubiæ voluntatis tempus, opus habet custodia, ibi velut

ut ex insidiis aggreditur hostis è somno excitatum, ut ex improvise figat aculeum.

Miser diabolus! aperto Marte congregi veritus, latebras quærit; ut fur, noctem observat. Quid ages? sola contra hunc furem opus est vigilantia, fugit, si se sciat observari.

Diei primitias occupat: ut enim dimidium facti, qui bene cœpit, habet; sic à malo, quod absit, diei principio, ægrè melior exitus posset expectari. Prima debentur Primo.

Quàm sollicitus in nostri ruinam est dæmon? dies illi non sufficit, noctes addit, præoccupat vigilias. Væ segni, & in aurem utramque sinè sui cura, sinè superum præsidii, dormienti;

## XXVI. JANUARI.

*Abstinere à litibus non solum liberale est, & Christiana pace dignum, sed & fructuosum.* S. Ignat. vitæ l. 4. §. 7.

**S**I quam rerum temporalium jacturam virtutis amore feceris, solet eam Dominus abunde compensare. Melior est pugillus in pace, quàm thesauri cum jurgio. Quid juvat augere censum, & imminuere charitatem.

Difficile est litem movere, nec violare charitatem. Ut aliena ametur iniquitas, non præcipio; solum dico: nunquam ita odio habendam esse injuriam, ut illum, qui fecit, odisse liceat. Cave, nè indignaturus factis, simul & homini indigneris.

Minima charitatis jactura pejor est quavis temporali; hæc enim præterit, illa manet: pro qua vitanda totius etiam mundi amissio toleranda foret.

Punctum est, pro quo tantopere certamus. Si lucra petimus, æterna quæramus. Quid litigamus pro re, cui opinio nostra pretium fingit meliùs, quàm facit.

XXVII. JANUARI.

*Periculi plenum est, unâ omnes viâ cogere ad profectum; pejus alios ex se metiri. S. Ig. in vita.*

**Q**UOT homines, tot sententiæ, tot diversi vultus, tam variæ voces; itâ, ut prodigium sit, unum in his cum alio convenire; major in anima rebusque hanc spectantibus diversitas. Non sinunt se ad unam omnes modelam cogi

Si suus pedi cuilibet aptatur calceus, nec unum cuique patellæ servit operculum; qui fieri possit, ut unâ singuli animarum mori curentur medicinâ. Hoc non esset sanare, sed perdere

Ars artium est regimen animarum, ut quæstuosissima omnium, itâ longè difficilima. Ut corpus, itâ, & animam, non cuilibet medico fidas. Quæras optimum.

Dum Spiritus Sanctus animarum Magister venit, in varias se partitus est linguas, & variis linguis loquebantur Apostoli; omnibus  
nem-

nempe omnia fieri debet, qui audire vult  
Apostolus.

XXVIII. JANUARIIL.

*Si quæ à Deo creata sunt bona omnia in una,  
& in altera lance carcer, catenæ, probra  
locarentur; illa præ istis momentum habe-  
re deberent nullum. S. Ignat. apud Ribad.*

l. 5. c. 10.

**B**ona, quæ mundus ita nominat, mala  
potius sunt, quam bona, quia sunt ani-  
mæ detrimenta, peccatorum illicia, perfe-  
ctionis impedimenta, Divini amoris obices.  
Et hæc tu bona credas? credas optabilia?

Et licet mala non essent, bona non forent,  
nec amorem mererentur. Quid enim sunt?  
si originem inspicias? nihilum: si naturam  
examinas? fluxa: si durationem attendas?  
brevia. Et hæc tam stultè deperimus!

Quæ mala mundus judicat, optima sunt:  
à perituris mentem abstrahunt; cogunt ad  
bonum; peccati occasionem adimunt. Cum  
enim tædet vivere, qui peccare delectet?

Cum bona fortunæ largitur Deus, dona  
miserit, an pœnas? jure ambigas; ast cum  
premit adversis; nullum certius divini amo-  
ris argumentum.

XXIX. JANUARIIL.

*Perpetuæ felicitati non fidendum: tûmque  
metuendum maximè, cum ad nutum flu-  
unt omnia. S. Ignat. in hist. Soc. l. 14. n. 9.*

**U**T mare, dum maximè placidum ridet, tempestates coquit; & nunquam certius periclitantur arces, quàm dum pacatis foris omnibus hostis cuniculos agit: ità plañè periculi plenum est animæ, non timere.

Non sunt tantæ amicæ fortis vires, ut co-  
pulet tranquillitatem cum perpetuitate; eò  
brevior esse solet, quò grandior. Quies hæc  
lassitudini potius, quàm fidei tribuenda; fu-  
giet, evolabit. Vide, quantum ei fidere possis.

Quidquid amitti potest, in censum bono-  
rum referri non meretur. Si quis mutabili  
fundamento spes suas inædificet, non diu  
stabunt. Vir fortunæ omnis contemptor,  
se contentus solo, ad felicitatem Dei accedit  
proximè, quia uterque sufficit sibi, uterque  
sinè alienis felix.

Quidquid felicitatis habes, intra te est, imo  
ipse es; nulli tibi thesauri sunt, esto arcæ tur-  
geant auro, omnia bona tecum circumfers,  
tam felix, tam dives, quàm bonus.

### XXX. JANUARI.

*Certis in causis silere, quàm loqui præstat: nec  
vindice opus est stylo, ubi sui ipsius vindex  
est veritas.* S. Ignat. in hist. Soc. l. 15. n. 44.

**N**ullum certius vindictæ genus est, quàm  
tacere ad calumniam, nec dignum  
agnoscere maledicum, ex quo vindicta su-  
matur. Verbum fuit, non fulmen: non est,  
quod commovearis.



Si hostis arma hebetes, pariter vincis, ac si eadem fregisses. Utere prudente silentio, clypeus erit, rejiciet ictum, nè vulneret. Tutius est clypeo, quàm gladio vincere.

Dolebit, quia contemni se credet convitiatus, si ad calumnias nihil reposueris; Tace, ictum, quasi non senseris, dissimula. Sic æmulus expectatione delusus, gravius sentiet, & dolorem, quem alteri intentavit, ipse feret, bis miser, in se afflicto, ac in altero non afflicto.

Tum magnum probabis animum, si his verbis major fuerit, nec ad quoslibet invidiæ motus commoveatur. Ranarum coaxatio lunæ splendori nihil detrahit, nec tibi oberrunt calumniæ, si eas non tam verbis, quàm factis diluas.

## XXXI. JANUARI.

*Si quid rogeris, quod noxium credis, illud cura: ut & quod postuletur neges, & eum, qui postulat, amicum serves. S. Ignat. apud Nolarci.*

**C**oncedere, quod nocere potest, nocentissimum inimiciæ genus, non beneficium est. Mater est, quæ cultrum subtrahit, ne filius vulneretur; tum amat efficacius, dum negat nocitura. Nescimus quid petamus. Si quid negandum est, ita fiat, ut benevolentia suppleat rem petitam; sic enim fiet, ut petens plus accipiat, quàm rogaverit,

reique inferioris carentiam melioris obtentu non sentiat.

Ut munus datum cum malevolentia, pretium amittit; sic negatio cum suavitate repulsam non sentit. Hoc est amaras potiones benevolentia condire.

Et repulsam, & contumaciam pati duplex vulnus est, quod simul ægrè ferri potest. Ut gratiora sunt amantis vulnera, quàm fastidiosi oscula; ità benevola negatio morosis præponderat beneficiis.

### I. FEBRUARII.

*Æger valentium conatus tutò remittat, æquitate animi, & patientia compensare contentus, laborans corpusculum non frangat.* S. Ignat apud Nol.

**I**ngentia sunt agrorum desideria, ingentia designant opera, si morbus absit: fallimur nempe: zelum putamus, & sensualitas est; enim vero non tam laborare, quàm morbi molestias effugere, cupimus.

Quid Indias designas? lectus tibi arena, & campus est uberrimæ messis. Martyria sistere necesse non est, habes ad manum carniciferos morbos, habes in lecto carcerem. Si scias uti. Omnium tibi meritorum campum ægritudo pandit

Si tuis Deus laboribus egeret, vires iis pares non negaret; patientiam petit, non victimam:

mam: non corporis sudores, sed animi æquitate[m] expectat.

Grandia illa, quæ optas, opera plus tuæ voluntatis, Divini beneplaciti minus habent. Quanto Dei voluntas tuis desideriis sanctior, tanto & morbus ægro præ Apostolatu utilior est.

## II. FEBRUARII.

*Qui aliis utilis esse cupit sibi multum prius vacare debet: ardeat prior domi charitate, qui amat alios inflammare. S. Ignat ibid.*

**N**on efficacius præcipitur pietas, quam agendo; nulla siquidem melior legum glossa, quam exempla. Omnes, qui ea viderint, imbuentur, nec ullo egebunt commentario. Vidisse, didicisse est.

In arena prius se exerceat miles, qui certum cupit ictum intentare; malè discitur inter pericula, & nimia sui fiducia sero nimis damnatur.

Animæ pericula & plura, & graviora sunt corporeis. Alios salvaturus se ne perdat, præfidiis eget validioribus. Inter malos non fieri malum, nec trahere à luc infectis contagionem, artis est nec obviæ, nec vulgaris.

Ordinata, si vera, est charitas; sua prius, quam aliorum lucra respicit, nec ullum præ se cupit esse sanctiorem; nam, si nemo dat, quod non habet, qui spiritu vacuus hoc alios replebit?

## III. FEBRUARII.

*Quibus in domibus suda semper, & immota dominatur tranquillitas, ibi multum sit nisi vitia nidulentur.* S. Ignat. apud Bart. l. 3. §. 36.

**N**ihil infelicius constanti felicitate. Ut terra nullo concisa vomere, aut lignibus agitata nihil nisi lolia, sic longa prosperitas vitia nutrit. Continua namque prosperitas emollit animum, virtutis studium labefactat.

Plures deliciis, quam adversis, abundantia, quam fame, blandienti fortuna, quam adversa perierunt Ærumnis alitur felicitas. Nemo censendus est miser, qui miseria sua contentus vivit.

Quid si prospero, quem constanter experiris, rerum successu hic merita tua solvat cœlum, nè sit, quod accipias in futuro? hæc sane, si ulla, infelicitas est maxima: æternæ felicitatis spe privari.

Si duplex cœlum sperare præsumptuosum est; quis hic appetat rosis coronari, si spinas in æternitate timere debeat? hic ure, hic seca. Qui nihil patitur, patietur.

## IV. FEBRUARII.

*Malè ponitur in precum assiduitate studium, quod in domandis affectibus collocandum.*  
S. Ignat. vitæ l. 3. §. 12.

**A**ffectibus vis & vigor tollendus est, ne nocere possint. Ut non satis est tondere senticeta, nisi eradicentur; inobservata germinabunt: ita vitia, nisi valida virtutis manu stirpitis evellantur, semper creabunt periculum.

Nec partem secare cupiditatis est satis; omnino extinguenda. Ut fera vulnerata ferocior sit, sic interdum mutila cupiditas violentius trahit. Ignis si modico solum rore impetatur, vehementiores in flammam assurgit. Bonum ex integra causa.

Nec uno domito affectu pacem meditare, vivunt alii, qui te male perdant. Quid interest unum, alterumve cecidisse, cum plures supersint? Unus sat est miseriæ. Nihil securitatis est pauciores inter hostes versari. Unus sufficit, ut vincaris.

Orare, ut longe facilius est, quàm se impugnare, ità hoc præ illo laudabilius: quam nemo vir erit magnæ orationis, nisi parus fuerit mortificationis.

## V. FEBRUARII.

*Absit, vel nocte una sub eodem tecto cum illo commorari, cujus animam gravi peccato noxiam noveris. S. Ignat. vitæ l. 4 n. 35.*

**Q**uo momento animam peccato consentit, elongatur à Deo, majusque Deum inter, & peccatorem, quàm cælum, & terram intercedit intervallum. Quem ità odit, ità

fugit Deus, qui tu amare & cum eo agere possis?

Quantò vehementior Dei amor pectus occupat, tantò acerbior odisse debet ejus inhonoratorem, imò paricidam. Amicus Dei, hujus inimicorum amicus esse non potest. Qui peccatorem non odit, Deum non amat.

Trahuntur ex conversatione mores, & mali etiam nolentibus vitia sua affricant. Longè proniùs est, ut à malo bonus, quàm à bono malus sua in consilia, & mores inducatur.

Ut cum peste afflato nemo prudens habitaverit, sic amicitia, & mora omnis dissolvenda est cum eo, qui per peccatum factus est Deo; Angelis, bonisque omnibus abominatio.

#### VI. FEBRUARII.

*Curas in mensem, vel annum imminentem mittis? heu me! unde tibi tam diuturnæ vitæ fiducia? S. Ignat. Vitæ l. 4. §. 30.*

**Q**uotidiana sunt humanæ caducitatis stimonia, & super tam fragili fundamento improvidi nescio quas machinas machinamur! nemo sibi tutò crastinum polliceri, cum possit, ità vivendum, tanquam hodie morituris

Nihil in salutis negotio differendum; avolat vita, cum qua clausa est janua merendi: vela contrahe, hodie vive: crastina quid ferat dies, incertus, nunc salutem tuam operare.

Quæ

Quæ citò fiunt, duplicem laudem habent, & gesti operis, & celeritatis; utramque amittunt dilata. Nulla in re magni nomen obtinebit, nisi cùm Alexandro statuat: nihil differre in crastinum, quod hodie dari possit executioni.

Nec flos magis caducus, nec vitrum fragilius est, quàm sit spes longioris vitæ: illum flatus decutit, istud ictus comminuit, sed hanc mille die uno casus adimere possunt.

## VII. FEBRUARI.

*Cùm quis impugnatur, semper habeat, à quo sustentetur.* S. Ignat. apud Ribad. l. 5. c. 10.

**P**rima belligerantium cura est, habere fœderatos. Væ soli! cum ceciderit non habet sublevantem; tuo consilio, aut viribus fidere, certum audaciæ argumentum, sed & ruinæ initium est, quod tot tristes casus ostendunt.

Quo validior, & astutior hostis, cum quo congregandum, tanto decet suis viribus minus fidere; accersendæ sunt suppetiæ. Hostis noster dæmon est, & fortissimus, quis solus cum solo congregari præsumat?

Candor ille animi se, & sua dejectioni alienæ submittentis novum è Cælo robur accersit, quo munitus præsidio vafri hostis fraudes non timebit.

Odit lucem Princeps tenebrarum; fugit, dum sua propalari videt consilia: & ut cu-

culi, sic omnes ejus technæ vim amittunt, si pateant

## VIII. FEBRUARII.

*Si vis scire, quid à te velit Deus, omni te primùm affectu & in alterutram partem propensione exuas, necesse est. S. Ignat. in Exercit. hebdom. 2.*

**I**n sibilo auræ tenuis loqui Deus consuevit, non auditur in tumultibus, ubi pugnat passio, aut partem in unam impellit natura, non percipitur locutio Dei.

Invitat Deus animam ad solitudinem, dum ei vult ad cor loqui. Solitudo hæc nec loci, nec corporis, sed affectus est. Tum auditur vox dilecti, ubi solus cum sola conversatur.

Qui deliberat, Deum solum attendat; huic consilia sua inædificet, reliqua omnia caduca sunt: delectant, sed ad tempus; prosunt, sed non perpetuo.

Omnis electio cauta esse debet, illa vero cautissima, ex qua pendet æternitas. Nec affectus hic, nec sanguis & caro, nec sensus locum habere debet. Opus est superno lumine, & prona in te voluntate.

## IX. FEBRUARII.

*Nunquam agas, vel loquaris, nisi prius, an id placeat Deo, prosit tibi, ædificationique futurum sit proximo, cogitaveris. S. Ignat. apud Lyr.*



**U**T humanæ, ita & divinæ prudentiæ amuffis lingua est. Hac, qui ritè uti novit, nã ille in utraque magister fit. Nulla hac artium difficilior. Qui in lingua non offendit, hic perfectus est vir.

Ars nulla sinè regula discitur; illa pro arte bene loquendi securissima; si ter verbum revocetur ad limam, priusquam semel erumpat ad linguam; scilicet ne Deo, ne sibi, ne proximo noceat. Hæc si in usu offet omnibus, multo minus, sed melius loqueremur.

Mira res! tacere facilius est, quàm loqui. Raro tactisse nocet, nocet frequentissimè esse locutum. Et tamen paucissimi, qui tacere sciunt: nempe natura semper inclinatur ad pejus.

Prævidere quid tibi, quid proximo, quid honori divino expediat, hominem distinguit à bruto: ideo nobis mens & ratio indita, ut hæc morum & linguæ magistra facem præferat, ne abeamus in devia.

#### X. FEBRUARII.

*Grandia in Dei obsequio præstare qui desiderat, ante omnia caveat, nè nimium sapiat.*

S. Ignat. in vita l. 4. §. 22.

**A**Nnimi demissio, ut proprii, sic & alieni in virtute profectus fundamentum est, sine quo quidquid ædificatur, ruinæ præparatur.

Altissima rerum omnium virtus odit alta; libentius amplectitur medium, amat modum.

De.

Deus altissimus quidem est, ad eum tamen, nisi per humilia non pervenitur.

Nec enim bonum in magno, sed in bono magnum collocandum. Æstimat illum plus Deus, qui se minus; illum favore suo replet, quem sui æstimatione plus exinanitum reperit.

Cum humilibus ut fermocinatio, ita cooperatio ejus. Depressione nostri exaltatur Deus, qui gloriam suam alteri non dat, in hoc glorificatur maximè, si nos ejus amore maxime deprimamur.

#### XI. FEBRUARII.

*Prudentia non parentis esse debet, sed imperantis.* S. Ignat.

**N**ULLA major est prudentia, quàm quæ extra erroris periculum hominem constituit. Ultra hanc nec facultas humana ire, nec desideria possunt assurgere, quàm sine difficultate discit, qui obedit.

Nulla scientia tantam habet infallibilitatem, quantam præstat obedientia: principiis primis prius & clarius est: obediendum esse.

Humanæ rationes postponendæ sunt divinis. Si locus illis detur, & via semel excusationi pandatur, vis omnis & vigor obedientiæ interibit.

Prudentia carnis est, quæ cuniculos agit obedientiæ subvertendæ, mille suppeditat  
illa

illa rationes, ut vel unum à commodis suis alienum opus subterfugiat.

## XII. FEBRUARII.

*In domo vitè ordinata senes juventutem, juvenes vivere debent senectutem, ut ex illis juvenum alacritas, ex his senum maturitas exigatur. S. Ignat. vitæ l. 3 §. 13.*

**S**enex ut venerationem jure poscit à juvene, sic huic multum debet: vitæ nempe probioris exempla; ut quem præcedit annis, non sequatur pietate. Senectus est norma gregis, speculum morum.

Gravius peccat senex, quàm juvenis; hujus culpam vel ignorantia excusat, vel naturæ ardor imminuit. Senem accusant omnia: ætas, experientia, mortis propinquitas, exempli ratio.

Vix unquam soli peccant senes, trahunt in sequelam juvenes: quis etenim culpam posse in juvene, quod toleratur, in sene? Quot in communitate senes, tot morum sunt magistri; vox, facta; præcepta, sunt exempla.

Multum à sene discit juvenis, si mercurium solidare, id est, motus frangere, coercere impetus, & levitatem maturitate didicerit temperare.

## XIII. FEBRUARII.

*Plus exquisita Prudentia cum mediocri sanctitate, quàm cum minori prudentia major sanctitas. S. Ignat. vitæ l. 5. c. 10.*

**T**anto minus ignorandum, quanto amplius est, quod curandum assumpisti. Melius regit sagacitas, quàm potestas, plusque industria efficit, quàm vires potuissent; ut bene imperes aliis, ratio imperet tibi.

Male tamen prudentia dicitur, quæ astutia est, hæc corrumpit, non promovet imperium; fraudes detectæ contemptum referunt, quæ subjectionem venabantur.

Infirmum regiminis fulcrum est simulatio, mima prudentiæ; quem de sinceritate suspectum habet subditus, paribus occurrere armis avet, tutaque omnia suspecta credit. Dissimulandum sæpe, simulandum nunquam.

Nemo prudens, nisi bonus; sola illa laudem habet prudentia, quæ ad æternæ sapientiæ leges disponit omnia. Humanæ prudentiæ consilia sunt caduca. Quis tuto nitatur arundini?

## XIV. FEBRUARII.

*Vineæ Domini operarii altero tantùm pede terræ insistere, altero ad iter urgendum sublevato esse debent. S. Ignat. in Epist. Gosw. Nikl.*

**D**ifferre nolentis est. Morosus obediens parum distat à contumaci; contra, ut qui

quī cito dat bis dat; itā qui cito paret, duplici se obedientiæ præmio dignum facit.

Quid non mora sapius obfuit? frequenter salus à momento pendet. Ubi damna sunt exigua, mora fortè veniam mereri posset, sed ubi anima, ubi æternitas periculum subit, nulla satis pœna expiatur.

Parendi promptitudo excoctræ virtutis characteristica est: cor enim omni affectu vacuum, solique Dei nutui intentum, id est, virum secundum cor Dei signat.

Nescit tarda molimina Spiritûs sancti gratia: nulla certior aut celerior ad virtutem obtinendam semita, quàm ut cum iubentis nutu parentis certet promptitudo.

#### XV. FEBRUARII.

*Possidenti Deum, etiamsi nihil habeat, nihil deest.* S. Ignat. apud Bart. l. 4. §. 35.

**L**ucrum plane mirabile, compendiosissima ditescendi via, non multum appetere. Unum si quærimus, omnia possidemus. Compendium singulare! sed quod non invenimus, nisi alia omnia perdamus.

Facile est, divitem fieri, ipsi nobis paupertatem imponimus, dum nostræ nobis imponunt cupiditates; has si excutiamus facile paupertatem sustinebimus. Quàm diu toleramus cupiditates, tam diu sumus nobis intolerabiles.

Beata commutatio: modicum, in nihilum da-

dare, & infinitum accipere. — Si aurum habeo, quid habeo, & quamdiu? si Deum possideo, quid non habeo, & hoc quàm diu?

Insanus sit, qui guttam sitit ex lacuna, cui mare immensum præsto est purissimæ voluptatis. Cui difficile accidat, siliquas præ manna nauseare?

## XVI. FEBRUARII.

*Etiam si nullo superaddito laus Deo par foret, ad majorem tamen Christi imitationem eligenda potius cum eo foret pauperies contemptus, & insipientiæ titulus, quàm opes, honores, & doctrinæ existimatio. S. Ignat. vitæ l. 3. c. 3.*

**U**T magnus discendi stimulus est, nobilitas magistri, sic in hujus verba jurare ingenui officium est discipuli. Cujus tu doctrinam audis? mundi, an Christi?

Ut docti simus, doctissimorum sententiis adhæremus, ac oppositas mordicus refellimus. Cur minus apud nos ponderis Christus, quàm in naturalibus Aristoteles, Aquinas in Theologicis inveniat?

Quid profuit Epuloni affluentia? Herodi arrogancia? profuit autem plurimum Lazaro paupertas, demissio publicano. Exitus acta probat.

Similitudo morum mater est amorum, hos à Christo peculiare non merebitur, nisi ejus se moribus, & consiliis quàm proximè

con-

conformare studuerit. Amor enim vel pares invenit, vel facit.

## XVII. FEBRUARII.

*Quidquid in secreto loqueris, ita profer, ac si toti hominum communitati loquereris.*

S. Ignat. apud Nolarci.

**I**Nfida hominum fides est, promittit, non servat fidem, quantamcunque secreti custodiam juret, incuria prodet, tantoque facilius, quanto severius adstrinxeris ad silentium.

Vis tua manere in abdito? prior serva: nec exemplo doceas, quid alter facturus sit. Frustra verbis legem imponis silentii, si exemplo veniam præbes manifestandi: ut tu, ita & alter suum habet amicum, cui fidere aliquid possit.

Minima præ reliquis fidesfœminis & pueris habenda: curiosum, & garrulum utrumque hoc est animal. Ubi minus prudentiæ, plus ibi garrulitatis est.

Secreti tenacem esse, non modò prudentiæ, sæpe etiam conscientiæ est. Nullum majus depositum quàm arcanum, quod, si custoditum vis, prior ipse ne propala.

## XVIII. FEBRUARII.

*Qui Religiosi Ordinis homines ad procurationem divini obsequii adhibent cum detrimento eorum regulæ, arborem destruunt, ut fructum inde carpant.* S. Ignat. apud

Bart, l. 3 §. 46.

Ita

**I**Tà se impendere aliorum salutem debet Affecta, ut suæ nihil officiat. Sic namque Medicus sibi prius consulit, ne contagionem curaturus in aliis, ipse trahat.

Qui sua sponte, qui celerius, quam ferat ætas, qui præter officium se proximo curando ingerit, plus plerumque damni, quam fructus colligit, se perdit, & alium non lucratur.

Regula, est Religiosi anima, quantum ab illa recedit, tantum perdit spiritus; sicque accidit, ut vivum cadaver alia omnia, & aliter agat, quam deberet, sibi noxius, suis gravis, aliis inutilis.

In illis, quæ tuæ vocationis sunt, Dei aderit benedictio, hanc in aliis non spera. Si alia à te fieri voluisset, huc non vocasset, Recedere ab instituto, est accedere ad errorem omnium gravissimum.

#### XIX. FEBRUARII.

*Quisquis amat felicem rei à se agenda finem imponere, se ipsum negotio, non negotium sibi accommodet, est necesse. S. Ignat. apud Ribaden. l. 5. c. 11.*

**Q**ui cuncta suo conformari arbitrio contendunt, & arrogantiam multum ostendunt, & ignorantiam: illa sibi, hac aliis nocent; nam & secundo rerum agendarum successu destituuntur, & turpi se ipsos labe prostituunt.



Prudens Medicus prius arteriam tentat, naturam attendit, deinde de medicina præferibenda sollicitus, quæ cum prodest uni, officit alteri, etiam pari morbo laboranti. Nec minor in animæ cura desideratur discretio.

Omnibus omnia fieri debuit Apostolus, qui Doctor gentium audire voluit. Ut credidam pedi, non pedem illi accommodat artifex, ita se hominibus aptet magister.

Media, non quàm pretiosa, quamque sibi in amoribus, sed quàm apta fini, attendendum: secus onerabunt ampliùs, quàm iuvabunt.

## XX. FEBRUARII.

*Experimento didici, ultra modum longis contemplationibus addictos, plus patere demonum præstigiis, ac reddi intractabiles.*  
S. Ignat. apud Bart.

**I**nfallibile erroris argumentum, est, suo ductu regi velle. Nemo sanctus simul & intractabilis, quia nemo intractabilis est humilis. Cum tamen non contemplatio, sed humilitas certus virtutis index sit.

Contemplatio, quæ te facit in sensu tuo abundare, tibi placet, non Deo; parum proficua, nisi ad arrogantiam; otio vicinior, quàm negotio

Complacentia illa ex contemplationis sublimitate orta, satis ostendit, cujus magisterio

rio doceatur, ejus nempe, qui parens est superbiae.

Seraphinum se mentitur vafer diabolus, sublimes ingerit affectus, sanctissima proponit mysteria, & ad altissima invitat, sed ut lapsu graviore ruas, eorumque numerum augeas, qui prius quàm ambulare nossent, volare conati, turpiter ceciderunt. Tutius in humili.

XXI. FEBRUARII.

*Valentior nunquam contra nos evadit hostis tartareus, quàm, cum secretò ac clanculum operatur. S. Ignat. in Exerc.*

**Q**uid magis pronum, quàm in tenebris errare? qui tibi in rebus animæ facem praefert, ignem sequitur fatuum, & dum maximè egeret lumine, hoc se destitutum, ac in præcipiti positum videbit.

Non est præsidium ità validum, quod cuniculis everti non possit, nec unquam plus habet periculi, quàm dum sui securum pericula non timet; momentò namque corrui, & tristi ruina docet, quàm timendus sit hostis, qui latet.

Quem vel sui præsentia, vel ab aliis, à quibus juvari posset, animi aversione inflammavit orcus, jam tenet ità constrictum, ut agrè sit ruina evasurus.

*Pacem simulat hostis, ut tutius feriat; nul-  
læ*

læ quippe infidiæ periculosiores sunt, quam  
quæ plus obtendunt securitatis.

## XXII. FEBRUARII.

*Vel unicum impedivisse peccatum, pro omni-  
bus totius etiam vitæ laboribus, & curis  
satis magnum impensæ operæ pretium est.*

S. Ignat. apud Biderm. l. i. c. 17.

**C**aligat plurimum, qui in vili etiam men-  
dicabulo non videt ingens pretium,  
nempe ultra corticem ille non aspicit; lacer-  
nam cernit, sed latent pretiosissima, sub ru-  
di concha inæstimabilis margarita, pro qua  
emenda decet omnes sumptus postponere.

Qui cogitat, quid Deus, quid creatura sit,  
facile intelliget, quam illius ab hac offensa  
sit enormis. Hanc impedire, est infinitum  
malum impedivisse.

Animæ pretium tanti Christo constitit, ut  
eam suo sanguine, hoc est, infinito pretio  
redemptam voluerit; quantò minoris nos  
eam emimus, licet pro ea totius vitæ curas  
expendamus!

Una peccati labes æternis ignibus non sa-  
tis expiatur; cogita ignem, quid acerbius?  
æternum cogita, quid longius? hujus peri-  
culo animam totius vitæ laboribus eruere,  
est æternitatem momentis brevibus emere.

## XXIII. FEBRUARII.

*Pete à Deo gratiam, ut multum patiaris;  
nam cui hoc tribuit, multum tribuit: in*

*hoc uno plurima ejus beneficia continentur*  
S. Ignat. apud Bart. l. 4.

**Q**uanto magis homo exterior patitur, tanto magis interior viget, illius molestiæ hujus augment merita. Rerum temporalium jactura lucrum facit æternum.

Satellitium vitæ patientia est; qui miseras odit, mundo exeat, quam diu vivit, eas dulcorare potest, vitare non potest. Velut quoddam numen tutelare miseris, patientia est, non quòd tollat, sed quòd levet mala.

Ini tecum rationes, & si absque palpo verum fateri velis, quantarum quotidianis erroribus pœnarum te reum ages? Solvenda sunt hæc debita, numquid beneficium est, hic ea potius, quàm purgantibus ignibus expiare?

Quanquam esto Angelus, & impeccabilis fores, optandæ tibi cruces forent, si credas æternæ veritati, leve tribulationis æternæ gloriæ pondus operaturum.

#### XXIV. FEBRUARII.

*Debet sana communitas se tueri, & totius integritatem matura partium corruptarum amputatione conservare, priusquam ex iis vitium trahat, quod sanum est. S. Ignat. vitæ l. 3. n. 20.*

**M**ira res! nemo solus vult esse malus Pars in affecto corpore, quidquid ubique est vitiosi humoris ad se trahit: sic quasi

aucto fœdere in corporis totius perniciem crescit.

Contagio pestis est communitatum. In ea dissimulanda benignum esse, crudelitatis est maximæ. Amputandum est membrum putridum, ne vicinum afficiat, sicque sensim sine sensu cor pervadat, & totum corpus periculo exponat.

Etiam nolenti sequiora nocent exempla; nihil metuentes tenui halitu pestem bibimus, non evitaturi malum, nisi separatione longissima.

Et cœlum malis Angelis, & Collegium Apostolicum pseudo-Apostolo se liberavit, nec illis est dedecori, quod indignos loco moverint. Malo perduto duplex accrescit bonum, semel ex imminutione mali, dein ex substitutione boni: Mathias Judæ lapsum abunde compensat.

## XXV. FEBRUARII.

*Pluris faciendæ est propria voluntatis abnegatio, quàm mortuorum suscitatio. S. Ig. apud Nol.*

**M**ortuorum ad vitam revocatio nec meriti prærogativam, nec virtutis characterem, significat. Gratia est gratis data, bonis & malis, Domino communicante, communis.

Quid prodest suscitasse mortuos, si domestica vivant vitia, si pravi affectus vigeant;

quibus mori, vita debet esse veri obedientis & virtutis characteristica.

Deo in Superiore subijci est optima vitiiis extirpandis medela. Si tu obedis Deo, obediet tibi caro; tu majori, tibi minor obtemperabit. Si tu contempseris obedire Deo, nunquam efficies, ut passio tua obtemperet rationi.

Te præstat cadaver fieri, quam cadaveri vitam reddere; cadaver ad locum, situm, & vestitum omnem indifferens insigni obedientibus documento, nihil optat, nihil refugit.

XXVI. FEBRUARII.

*Si à Deo expetenda sunt signa, & plura & clariora expetenda sunt de solis præceptis servandis, quàm de servandis consiliis. S.*

*Ignat. apud Guartem. cap. 22.*

**A** Nimalis homo non percipit ea, quæ sunt Spiritûs Consilia Christi, si audit, non penetrat; onus videt, unctiorem non attendit. Corticem nempe aspicit, non medullam, quo hebetudo oculorum non penetrat, ideo pauci consiliis moventur.

Magni erga homines amoris indicium in Deo est, quos suis dignatur consiliis. Quanto est filiorum præ servis conditio nobilior, tanto major optimi Numinis dignatio erga eos est, quos in sortem filiorum invitat.

Semper facta propositis minora sunt. Si soli præceptorum jugo te submittas, in pro-

ximo est, ut tentatione victus, etiam hoc executias

Optima, dum licet, eligere nemo prudens dubitaverit; tutiora præponimus infecuris, & cur minor animæ, ac inferior curâ salutis.

## XXVII. FEBRUARII.

*Difficilior ad virtutem genius, si seipsum fortiter expugnet, duplo meritis auctior evadet præ illis, quibus lene ac lentum ingenium nihil facessit negotii. S. Ignat. apud Bart. l. 4. §. 12.*

**M**Ale judicat, qui ex morum placiditate de virtute fert sententiam, non qui se gerat in externis, verum qui se interius vincat, inspiciendum, ut vera virtutis decem-peda statuatur.

Magnum naturæ beneficium est, velle conari, cui si labor accedat, id brevi insequetur, ut, quod negavit natura, conatus efficiat.

Nec ita obstinatus est ullus genius, quem conatus non emolliat. Proxenetâ naturæ, consuetudo est, ita seu celare, seu formare novit indolem, ut agnos è leonibus fecerit. Aude aliquid.

Si consuetudo altera natura est, beatus es, quia pro gustu tuo naturam potes eligere. Muta mores & naturam commutasti, ex naturali in artificialem. Facillimum est passionum remedium, nova consuetudo.

## XXVIII. FEBRUARII.

*Quisquis inter homines agere, versarique tutus desiderat, summi planè momenti id esse ducat, ut æquus sit omnibus, obnoxius nemini.* S. Ignat. apud Orland. l. 5. n. 24.

**P**artiales affectus periculosi sunt: à natura, non virtute nascuntur, à passione, non ratione nutriuntur: se, non Deum attendunt, quem si respicerent, quàm sit pater omnibus æquus, viderent.

Punctum circuli decet imitari: ex eo pares in omnem partem ducuntur lineæ, hæ quantùm in unam plùs partem inclinarent, tantùm recederent ab altera. In medio virtus.

Ut sol eodem omnes vultu aspicit, futurus his injurius, si solus aliis luceret; ità sine plurimum injuria uni addici non potest affectus. Omnibus esto amicus, nulli familiaris.

Ut charitas, non carnalitas audiat affectus, debet exeri propter Deum, vel quòd hujus imago, vel quòd sanguinis ejus pretium sit, quæ cùm omnibus æque congruant, par in omnes affectus motivum afferunt.

## XXIX. FEBRUARII.

*Si te Deus faciat multa pati, signum habe, quòd te velit facere magnum sanctum.*  
S. Ignat. apud Bart. l. 4.

**P**atientia cæli clavis est, adversa nos ad Deum compellunt, à quo abstrahunt prospera. Plures salvarentur, si plures plura



ra paterentur. Ut vites, sic & virtutes non nisi putatæ fructificant.

Si quæ in Angelos cadere posset invidia, ista foret, quòd homo pro Deo pati possit, Angelus non possit. Gloria non voluptati, sed adversitati, stat venalis.

Hæc est virtutis regula: mala pati, bona facere; utrumque juvat patientia, cum qua malum non est, sinè qua bonum non est.

Ut medicus ægro jam desperato indulget; quem secat, urit, disponit ad sanitatem; ita æternus Pater filium, quem amat, castigat, cui parcat, non curat. Absit à me, Domine, prosperitas, absit indulgentia!

## I. MARTII.

*Qui se, suasque rationes Dei obsequio postponit, huic Deus multo consulit melius, quàm potuisset ipse consulere sibi, si Dei obsequium suis rationibus postponere voluisset. S. Ig. apud Bart.*

**C**ui prima est de Deo cura, omnia illi fluent secunda; cum enim ea, quæ Dei sunt, curamus, ille curat nostra, eaque longe felicius, quàm ipsi non solum præstare, sed & optare potuissemus.

Desideria propria suspecta nobis esse debent; cum quid nobis expediat, ipsi nesciamus. Periculosa est nostra electio, id solum est reliquum consilii, ut Deum amemus, &

illum finamus de nobis agere, quod illi visum fuerit.

Conatus nostri sæpe sunt detrimenta nostra, quæque appetebamus vehementius, quoties experti sumus, maxime nocuisse? Quæramus Regnum Dei, cætera adjicientur nobis.

Cùm quis sui videtur oblitus, tum Deus ejus maxime recordatur. Et quidem ejus est Providentia, ut cura illi sit de omnibus, tenerior tamen, & paterna de illis, qui sui minorem habent. Jacta spem tuam in Dominum.

## II. MARTII.

*Longè ad infima ei est descendendum, quisquis eniti ad sublimia velit.* S. Ignat. apud Ribaden. l. 5. c. 3.

**A**D favores divinos alia non reperitur semita, quàm per demissionem. Hac ivere, quotquot ad virtutis apicem sunt eluctati.

Altiores obices, quos ob arduitatem transilire non vales, profunde inclinatus poteris superare. Ventus excelsas cedros frangit, parcit myricis, quæ se ad omnem ejus nutum submittere noverunt. Periculosa sublimitas!

Si recumbas invitatus in novissimo loco, sperare poteris te auditorum: amice, ascende superius: Sic aquæ sublimius ascendunt, dum prius profundius descenderunt.

Hu.

Humilitate velle honores mercari, duplex arrogancia est; mereri altiora laudem habet, non quærere; laudabilia agere, non laudem affectare, labor est, qui suum ab æquo iudice præmium exspectare potest. O quàm parum sæpe humilitatis in humilitate! Aliud est esse, aliud videri humilem.

## III. MARTII.

*Si velex gradus, in quo stat, auctoritate, vel ex officii, quod gerit, debito mundum reformare quis vellet, is à se incipiat est necesse. S. Ignat apud Bart. l. 4. §. 36.*

**Q**uanto altiore te loco fors constituit, tanto majorem imposuit obligationem recte agendi. Tibi velamen vitii nullum est. Patet omnibus, sed & omnibus officit, magis exemplo, quàm culpâ noxius.

Frustra est doctrina, quàm facta non confirmant, levissima erit, ad nullius animum penetrabit, nisi ei pondus accedat ab exemplo. Oleum, & operam perdit, qui docet bona, cum agat mala.

Ut optima etiam instrumenta nullum eximium artis opus per se dabunt, nisi artifex, qui eis utitur, eximius fuerit; sic planè consilia etiam saluberrima vim amittunt, nisi, qui ea suggererit, etiam usu approbaverit.

Deformis est mundus, reformationis, quis dubitat? indigus est, sed primam in se quisque

que curam acuat, ubi non deerit, labori materia: qui sibi nequam, cui bonus?

## IV. MARTII.

*Si quando calumnias ab improbis, vel ignavis in te congeri observaveris, Deum ora, ut avertat, ne quando mala de te dicantur, & vera dicantur.* S. Ignat. apud Bart.

**T**Ota felicitas intra nos est, & hæc est beatitudo; miserrimi quippe essemus, si probitas alieno pendere deberet ab arbitrio. Talis & tantus es, quantus intra te, & Deo teste, es.

Si, nescio, quàm tumidâ panegyri te inter Sanctos fama collocet, malum non tollet, si malus es; ità vicissim si tua te non arguat conscientia, satyras tutus ride, nihil de bono tollent.

Id solùm interest, nocens, an innocens vituperia patiaris? nulla nobis nocebit adversitas, si nulla dominetur iniquitas. Non est, quod metuat innocentia.

Mens conscia recti securior mendacia famæ, quàm fructus rupes excipit: tumultuetur hic, illa non commovebitur. Confunde famam, aliter, ac illa vulgat, age.

## V. MARTII.

*Prudentiæ tuæ statuendum relinquo, præstetne terrenis omnibus nunc illud opponere: Quid prodest homini? an verò postea brevi frustra ejulare: Quid profuit? S. Ignat. vitæ l. 2. n. 2.*

Aman.

**A** Mantur flores, dum vernant, sed quàm breve tempus est! ubi exarescunt, abjiciuntur. Sic omnia terræ bona, dum sunt, quàm breve hoc momentum! delectant: illico transeunt, & usu ipso fastidiuntur.

Dum opibus aut deliciis fruëris, te crede somniare, discusso somno, nihil inventurus in manu, & quid hoc somnium? & quamdiu prodest?

Omnis gradus felicitatis, ad quem aspirare potes, fugacia secum trahit gaudia; splendidè levaris cum pyrobolo, sed momentum expectata, nihil supererit, nisi fumus, & hunc captare, quid prodest?

Nihil prodesse crede, nisi, quod æternùm prodest, quod ad beatam æternitatem comparandam conducit; obest autem gravissimè, quod huic impedimentum ponit.

## VI. MARTII.

*Qui mundum contempsit, statua similem esse oportet, quæ nec lacerna indui recusat, nec purpura, qua prius ornabatur, detrectat spoliari. S. Ignat. apud Lancic.*

**L**ocupletibus feliciorē esse præstat, quàm locupletem, nec id admodum difficile: si sciamus, nihil desiderare, nam sola pauperem faciunt desideria.

Miseros nos facimus superfluarum rerum sollicitudinibus, & tenuioris fortunæ impatientiâ, quam si ferre vellemus miseræ

omnes evanescerent. Non censu constat felicitas.

Præstat dominum esse fortunæ, quam servum. Dominatur; qui novit ejus dona contemnere; Servit, qui expetit. Morbus apud multos incurabilis, quibus per affluentiam omnium non desunt vota Scilicet hydrofici sitis nunquam satiatur.

Usum rerum necessitas definiat, non cupiditas. Modicum est, quo egemus, quid ad superflua curas extendimus? Beatior est Irus sorte suâ contentus, quam Cræsus plura desiderans

#### VII. MARTII.

*Minus de scientia, plus de virtute. S. Ignat. apud Bart. l. 5 c. 8.*

**N**on qui multa, sed qui utilia scit, doctorum syllabo est inferendus. Quantum est in rebus inane! scire quod non prodest, proximum est ignorantia.

Nocet scire, quod non prodest, imò sapè etiam, quod prodest. Scientia enim inflat, nutrit arrogantiam. Sicut non est inde beatior voluntas, quod plura cupiverit, ita nec mens est sanior, quod plurima noverit. Sciendi appetitus prima peccandi occasio fuit.

Infelix homo, qui scit creata omnia, & nec se, nec Deum noscit: beatus autem, qui hæc scit, etiamsi illa nesciat. Ea, quæ supra nos sunt, diligere præstat, quam intelli-

gere Affectus plùs instruendus, quam intellectus.

Discamus non opinioni, sed vitæ; non oblectamento animi, sed utilitati. Discamus vivere, non loqui; operari virtutem non speculari; hoc est, medullam præ cortice diligamus

## VIII MARTII.

*Univerſum mel, quod colligi poteſt ex floribus hujus mundi; tantam non habet dulcedinem, quantam habet Domini Jeſu felicitæ acetum. S. Ignat. apud Bart.*

**F**elicitatis titulum injuſtè occupârunt oblectamenta mundi, eò magis ab his alienum, quo nihil infelicius eſt, quam videri felicem, & non eſſe; niſi tu æternæ perditionis cauſas in felicitate numeres.

Voluptas irritat appetitum, non ſatiat, non implet animum, ſed inquietat; dulcedinis guttam immenſo amaritudinis mari obruit, & momento blandiori æternam mercatur infelicitatem.

Ut ex amaris herbis mel conficere noverrunt apiculæ, ſic amara Chriſti patientis memoria dulcedinem propinat, modò ſint, qui eam velint deguſtare. Hæc ſanctæ hujus alchimix virtus eſt.

Amareſcit, quidquid dulce mundus offert, & dulceſcit, quidquid amarum accidit, dum Chriſti Paſſio menti obſervatur.

## IX. MARTII.

*Si mihi totius mundi aurum suppeteret, non adjuvarem vel obulo illum, qui sua culpa se religione indignum reddidit. S. Ignat. apud Bart l. 3 §. 19.*

**S**I perdatur thesaurus, quæ non funduntur lacrymæ? si periclitetur sanitas, quæ non curæ fatigant? & tantum bonum, quantum est beatitudinis æternæ pignus, arrha divinæ gratiæ inter levia censeatur?

Deplorata sanitas est, dum æger mala gravissima non sentit; imò credit, optimè secum agi, dum magnis passibus ad mortem prope- rat. Perire, nec sentire, magna Dei pœna est.

Seu favores talibus cœlum mittat, seu dolores, semper timoris materiam præbet; dum favet, bona, quæ gesserunt, compensare, si premat, etiamnum vindicare, credi potest.

Illiberalior in eos plerumque Deus est, qui habendi spe, aut cupiditate se Deo subtraxerunt, digni minùs accipere, qui centum jurejurando promissum contempserunt. Leviora forent hæc, gravius illud iræ divinæ argumentum. Nemo mittens manum ad aratrum, & respiciens retro aptus est regno Dei.

## X. MARTII.

*Id tibi principium esto, ut sermonis quidem ingressum facile concedas aliis terrena sapientibus, exitum vero tibi reserves, ut ac-*  
cep-



*ceptum qualecunque sermonis metallum auro tingere coneris. S. Ignat. apud Bart.*

*l. 4. §. 36.*

**S**icut cum Doctore gentium Apostolo cupias sancto alios capere dolo, aucupis ingenio uti debes: eandem hic cum ave, cui insidias fruit, vocem simulat, ut suavius alliciat; pari tu communi sermone hominum benevolentiam aucupare.

Animalis homo non illico percipit ea, quæ sunt spiritûs, erigendus est sensim sine sensu animus, & à terrenis non per saltum, sed quasi per gradus ad superna evehendus. Violenta terrent.

Amica hæc sermonis alternatio thaumaturga est, prodigia faciet, obstinatum peccatus quod violenta nequivit oratio movere, suavior hæc familiaritas in ceram emolliet, formam, ut voles, in omnem ducendum.

Primum benevolentia obtineri debet, quæ semel habita, captivum tenes animum, nec difficile à terrenis ad æterna spontè secutorum deduces.

#### XI. MARTII.

*Propter nostram in spiritualibus rebus acediam consolatione divina merito privamur.*

*S. Ignat. de discret. spirit.*

**S**æpe innocenter vapulat dæmon, cui desolationem spiritûs adscribimus, quæ fructus est acediæ nostræ, quæ plus nobis sæpe, quàm dæmon nocet.

Quo-

Quomodo sperare Dei liberalitatem potest, qui ad eum avaro in eum est animo, ut vel pusillum temporis ei pigeat immolare. Sic ille nos visitat, ut nos illum colimus. Echo nempe est, æqua fervori nostro mensura respondet.

Heu me! quàm noxius animæ nostræ hostis est acedia! Quot Dei favores impedit! quot merita dissipat! quot consolationibus privat! Hæc est malorum omnium, quæ in spiritu patimur, scaturigo; Vince hanc & hostes tuos enervasti.

Quantò liberalius terra vapores in cælum mittit, tantò fecundiores inde imbres recipit. Nostrâ in cælum liberalitas ejus in nos metitur beneficia. Qui plena manu seminat, huic læta sub falcem messis veniet. Qualem volumus, talem se nobis Deus exhibebit.

## XII. MARTII.

*Plus una hora Manresa Deo Magistro discitur, quàm quidquid ubique Doctorum est, tradere potuissent. S. Ignat. vitæ l. I. §. 14.*

**D**ivinae scientiæ schola suorum profectum non ex discantis ingenio, sed ex docentis voluntate metitur. Facile est ibi evadere doctum, ubi ille spiritus magister est, in quo sunt omnes thesauri sapientiæ & scientiæ.

Ut lumen rapta repente nube fulgurans momento abstergit tenebras, & multa detegit; sic divinæ illustrationis radius cælo affu-

fusus, pulsa caligine tantum lumen affundit, ad quod omnis sapientum turba cæcutiat, est necesse.

Frustra nos, & ingenium evisceramus cum araneis: tota nocte laborantes nihil capiemus ex hac sanctorum scientia, nisi nos ille doceat, qui sine verborum strepitu ad cor loqui consuevit.

Nec speret profectum, qui nescit secum habitare. Manresana specus aperit virtutis academiam. Ubi magister Crucifixus, cælum, & terra libet, studium est meditatio. Hic, qui doctus est, verè sapiens est.

## XIII MARTII.

*Nullum lignum aptius est excitando foco amoris Dei, quàm lignum sanctæ Crucis. S. Ignat. apud Bart. l. 4.*

**M**irabilis artifex amor est, qui amati memoria, velut foco usus adversa vel mitigat, vel planè tollit, inò, quod maximum ejus magisterium est, in dulcedinem commutat.

Ama, nec dura ulla senties; illi gemunt sub onere, qui nolentes ferunt; hi enim succutunt onus, nec excutunt. Totum pondus impatientia est.

Non vi cum adversa fortuna agendum, sed amore; majores huic, quàm fortunæ faventi sunt vires. Ubi amatur, ibi non laboratur. Facilè crucem bajulat, qui bajulat.

lat, quod amat. Humerus, & robur patientiæ amor est.

Amor nostri crucem Christo levem fecit, Dei amor Christi crucem nobis tolerabilem faciet. Facilis est animi duris in casibus fortitudo, non machina, non lacerto, imò nec voto eget. In nobis sunt omnia; robur virtutis amor est.

#### XIV. MARTII.

*Servitutis, aut quæ mihi ante oculos ponitur, mortis timorem in minimis pono, unus Numinis offendendi timor me coërcet. S.*

Ignat. vitæ l. 1. §. 24.

**N**ihil est sub sole malum, nisi peccatum; quia nihil est, quod non velit Deus esse, præter peccatum, quod ità odit, ut si amare posset, Deus non esset. Odit illud necessario, & odit æternum. Mors, vincula, egestas adedè mala non sunt, ut optabilia sint, tanquam optima; sunt Dei nos amantis dona, peccati remedia, gratiæ divinæ lucra, & quod caput est rei, divini amoris fomenta.

Quem absolvit conscientia, non est in orbe, quod timeat. Nemo miser esse potest, nisi suo facto: solum infortunium, quod nobis accidere potest, nostrum opus est. Nulla in caput nostrum cudi tela in aliena officina possunt.

Magnorum nulla non injuriâ atrox est, quid igitur erit, si Regum omnium Dominus of-

offendatur? nimirum tam atrox hoc facinus est, ut si cælo, terræ, hominibus, Angelis perniciës immineret, hæc minüs timenda forent, quàm Dei offensa.

## XV. MARTII.

*Nulla est tranquillitate ipsa pejor tempestas, nec ullum adversariorum genus periculosius, quàm adversariis carere. S. Ignat. apud Bart. l. 2. §. 18.*

**P**erpetua tranquillitas, sub larva securitatis, gravissima minatur animæ pericula. Mater est otii, nutrix acedix, fomentum sensualitatis. Quanta hæc in spiritu damna!

Adversitas nos admonet officii, compellit ad Deum. Dormiunt etiam Apostoli, dum placidum dormit mare; tempestas eos clamare cogit: Domine salva nos, perimus.

Pati mala non est malum. Pati à malis etiam bonum. Pati propter bonum, adhuc meliùs, pati ob mala, pariter bonum est, quia sic ea expiare bonum est.

In tempestate nascitur margarita, in ignibus excoquitur aurum, inter malleorum ictus corona euditur, nec aliter, quàm adversis nutritur virtus. Hostis nempe facit fortem, ut tempestas nautam commendat.

## XVI. MARTII

*Nil suavius est, quàm amare Deum, sed ita, ut ex amore illius multa patiaris. S. Ignat. vitæ l. 1. n. 33.*

Om-

**O**Mnis felicitas hominis amor est. Tanta es, & tantum vales, quanti est, quod amas. Provide proinde, quem ames? si rem perituram? tibi ruinam præparasti. Si Deum? felicitatis apicem attigisti.

Amare, nec pati velle, est otiosi. Cupiditas est, non charitas, hujus enim lydius durus est, qui verum à spurio amore distinguit. Se, non Deum amat, qui hujus amore pati recusat.

Deum amare inter prospera, virtutis nomen non meretur, hoc etiam sensualitas potest. Sed ubi cruce cælum depluit, amplius Deum, & has propter illum amare, veræ virtutis est experimentum.

Ut collisio è filice flammam elicit, & agitatione flamma crescit: sic fortunæ adversitate vere Deum amantium corda amplius accenduntur. Cur tu friges?

XVII. MARTII.

*Tantò plùs sperandum in Deo, quãto res magis videntur desperatæ: ubi deficiunt humana, ibi præsto sunt auxilia divina. S. Ignat. vitæ l. 4. n. 2.*

**U**bi plena opibus turget arca, & minora frugibus sunt horrea, ibi non est spes. Ubi omnia ultra votum suppetunt, ibi non Deo fiditur, sed creaturæ

Maledictus, qui carneo innititur brachio; quis fragili se confidat arundini, cum colum-

lumnæ possit immobili spes suas inædificare?  
Et nomen, & robur spes amittit, dum mediis  
nitimur, quæ videmus.

Gaudet Deus nos periculis jactari, & ope  
humana destitui patitur: quia spe nostra de-  
lectatur, sciri que gaudet suo nostra stare au-  
xilio. Differt opem, ut spem exacuatur.

Si opes amisisti, si patronis destitueris,  
tum maximè confide, patronus tibi sufficit  
unus, sinè quo nihil possunt omnes.

## XVIII. MARTII.

*Quem labor tenet alienæ salutis occupatum,  
efficacius eum semper modestia humilis,  
quàm authoritas iuuerit, vincetque caden-  
do citiùs, quàm pugnando. S. Ignat. vitæ  
l. 4. f. 384.*

**Q**uæ in arcibus, eadem etiam in animis  
expugnandis plurimum facit industria;  
ut subigantur illæ, & isti deprimantur, op-  
pugnaturus se infra oppugnandi pedes abji-  
ciat, absconditus cuniculos agat, sic ever-  
tuntur, quæ vi apertæ restitissent.

Paucas in retia sua volucres auceps co-  
geret, si fulminaret; terreret minis, non alli-  
ceret. Suavi canendum est fistula, quod vis  
non potest, hæc efficiet.

Homo capitur humanitate, nullus adeò  
ferus est, qui submissione non provocetur ad  
amorem, ubi contra odium parit arrogan-  
tia, & fastus contemptum trahit,

Alia

Alia asceticæ, alia politicæ militiæ media sunt, hæc vim apertam opponendo, illa se submittendo viam invenit ad victoriam.

## XIX MARTII.

*Pluris tibi sit cujusvis hominis salus, quam thesauri omnes universi mundi.* S. Ignat. apud Ribaden. l. 5. c. 8.

**Q**uod in nobis pretiosissimum est, ferè minimi habemus. Anima, quæ rei infinitæ pretio constitit, vilis esse non potest, nisi illis, quibus nihil est se vilius.

Salutem hominis cælo Christus præposuit, ut eam obtineret, divinitatem suam quasi prædegit, certè vitam, & sanguinem dedit. Quam sapientissimus hic insitor tanti fecit, cur nos inter ultimam curamus?

Falsa nempe statera res metimur. Res nihili, quales sunt opes, eruditio, totius vitæ sudoribus quærimus, pro hominis salute labor omnis gravis nimium, & intolerabilis accidit.

Dei judicium attende: quanti Deus omnem mundi potentiam facit? quanti nos pilum, & nucem cassam: salutem autem hominis etiamnum sitit. Præter se, hac nihil habet amabilius, nihil in votis magis.

## XX. MARTII.

*Tantum valet res, quantum illam Deus fecit valere.* S. Ignat. apud Bart. l. 4. §. 35.  
Ve.



**V**Ehementer sæpe fallitur, qui secundùm colorem de rebus iudicat. Trapezita peritus distinguit adamantem à vitro. Ille remotissimus est ab errore, qui ad divinæ mentis balancem omnia ponderat.

Si omne, quod splendet, aurum credat mens tua, heu! quoties decipietur? Nihil est bonum, nisi, quod ducit ad summum bonum,

Deus finis noster est, ad quem tendimus, in quo æternùm quiescemus; viam quæ ad illum ducit, bonam crede, ama, elige; quæ abducit, esto rosis strata sit, quàm longissimè fuge.

Aurea clavis parùm facit ad intentum, si clausa non referet, tali præferenda & ferrea, cui seræ patent. Rei nempe pretium non color, nec opinio, sed ad intentum aptitudo facit.

Proh! quantùm erramus! omnia electioni hominis subiecit Deus, sed ut media sint ad Deum. Væ! qui his contra Deum utuntur. Tantò res quævis peior, quantò certius abducit à Deo.

## XXI. MARTII.

*Bonos bene, malos male valere gaudeo: illi ut integris ad Dei gloriam utantur viribus; isti, ut multiplicatis infirmitatibus ad Deum compellantur.* S. Ignat. apud Ribad. 25. cap. 10.

Ne-

**N**escimus quid boni lateat in morbis. Inter hispidos cortices dulcis latet medulla, modò noverimus hanc è spinis eruere dulcedinem, mel è thymo, ex morbo sanitatem elicere. Genus quoddam sanitatis est, hominem non esse sanum.

Dum languet corpus, vegetatur spiritus. Multos meliores fecit ægritudo, quos sanitas perdidisset. Ut tenebræ juvant ad splendorem; sic morbi ad vitam meliorem. Deferuntur à vitiis qui ea deferere noluerunt.

Ufus rei rem bonam facit. Dissipiat, modò profit; etiam medicina ingrata est palato, sed quia profutura speratur, amatur, avidè sumitur. Quod potest desiderium valetudinis corporalis, cur non possit spiritualis?

Es infirmus? gaude: peccare non potes. Lecto affigeris? tempus tibi suppetit, ut ad cor redeas. Langues? miseriam humanam cogita, cogita præ foribus æternitatem. Quanta hinc bona!

#### XXII. MARTII.

*Si vel catulum tibi Deus præfecerit, tu non recusa: libenter illum Ducem vitæque magistrum, Deo auctore, sequere. S. Ignat. apud Nigron. de nec. spir. cap. 5. §. 75.*

**S**ibaculum absque metu sequitur, qui scit eum à vidente regi, cur difficile sit catulum sequi, si hunc in nostri regimine Deus, totus oculus regat? nisi minor apud nos Dei  
quàm

quàm pueri apud cæcum autoritas sit, cui se promptè confidit.

Obedientia magna virtus est, sed tanta non foret, nisi pretiosissimam sui partem, iudicium homo per illam Deo immolaret, imò suum pro divino commutaret.

Ex imperantis vilitate obedientiæ accrescit pretium, tantùmque huic additur, quantum minor eum commendat autoritas, cui pareretur. Hic enim & intentio purior, & fides esse solidior convincitur.

Illud obtinet obediens, quod soli Deo est singulare: non posse errare. Vicaria divinæ sapientiæ obedientia est, par utrique infallibilitas.

## XXIII. MARTII.

*Expedit nihil differre in crastinum, quod hodie prestare possis* S. Ignat. apud Bart. l. 4.

**Q**UÀ Philippo arte magni nomen accrevit, nihil in crastinum differendo, quod hodie agi poterat, ea lex debet esse Christiano, cui nemo crastinum pollicetur.

Non amat tarda molimina Spiritûs Sancti gratia, in iis maxime, quæ laudari non possunt, nisi confecta. Geminat operis pretium, qui executioni addit celeritatem.

Quoties nocuit distulisse! quæ in aliam diem rejecta penitus emanferunt. Turpis vecordia, luenda multis totâ æternitate, nec satis eluenda.

Opus bonum dilatione corrumpitur: differre quippe, ut nolentis, ita nauseantis est. Virtutis exercitio quantum accedit moræ, tantum decedit laudis. Nullum proposita sanctum effecerunt.

## XXIV. MARTII.

*Longè melius est obtinere unicum granum alicujus boni cum securitate, quàm centum cum periculo salutis.* S. Ignat apud Bart. l. 4. §. 35.

**N**emo prudens se perdit, ut alium lucretur; sicut nec medicus infirmatur, ut alium curet. Omnia infra salutem propriam habenda.

Quantò thesaurus est pretiosior, tantò majori cura servandus, & quam dabit homo commutationem pro anima sua? quam qui periculo facit obnoxiam, eam non aestimat.

Inter lucra, quæ tam avidè quæris, te primum computa; dum alios ad pietatem animas, te non negliges; nec sinas alios tua institutione te fieri sanctiores. Cur te ipsum inter vilia habes?

Pessima diligentia, quæ semper ad alios. Cura tui omnibus curis est præponenda. De te, à te ratio exigetur. Martha! Martha sollicita es erga plurima! porrò unum est necessarium; salutem tuam in tuto collocare.

*Incredibilis est solatii: quoties divinis epulis  
accumbimus, toties non Christi tantum,  
sed & Matris ejus sanctissima carne nos  
pasci. S. Ignat. apud Lyræum.*

**Q**Uæ Bernardi olim, hæc communis om-  
nibus est latandi materia, quòd pasci  
à vulnere simul & ab ubere lactari nobis con-  
cedatur. Caro quippe Christi, caro est Mariæ.

Quanta dignatio bonitatis in Matre, quan-  
ta bonitas majestatis in Filio! lacte illa, hie  
sanguine nutrit, se uterque dat, ut nos reci-  
piat. Qualis commutatio! vecordes nos &  
salutis immemores! nisi pacto stamus.

Æstima, ô homo conditionem tuam! to-  
ties Christi sanguine, & Mariæ lacte pascus,  
consanguineus tantorum es effectus, cave de-  
generi ad quisquillas affectu cognationem  
tam sanctam maculare!

Habent, quod invident Angeli, quibus  
hæc gratia nunquam accidit! humanæ cala-  
mitatis hie asylum est; quem terret Majestas  
Judicis, hunc erigit pietas Matris, quem ar-  
cet justitia, misericordia invitat.

XXVI. MARTII.

*Amorem tui solum, Deus! cum gratia tua  
mibi dones, & dives sum satis, nec quid-  
quam ultra posco. S. Ignat. in orat. sibi  
familiari.*

**Q**uæstuosissimus ille amor est, qui sine lucro, cujus omnis fructus est amare. Alii amores mercatus sunt, ubi tantum recipitur, quantum datur, vilis, & abjecta hæc avaritia est; gratis amet, qui verè amat.

Etiam belluæ amant beneficia, & vultures eò advolant, ubi bolum sperant. Amor Dei assurgere debet altius, lucrum non quærat, omne, quod assequi lucrum possit, amor sit.

Infinitem damnium incurrimus, si aliam præter Deum mercedem quærimus. Si alia omnia obtineas, sine illo miser es. Cælum ipsum sine Dei amore infernus esset, & infernus cum Dei fruitione in cælum transiret.

Omnis creaturæ amor inutilis, imò noxius est. Solus Dei amor fecundus est, è quo pleno alveo promanant omnia dona gratiæ & gloriæ. Ama Deum, quid facilius? & beatus es.

#### XXVII MARTII.

*Nulla res creata potest talem letitiam in anima creare, quæ possit æquare gaudium Spiritus Sancti.* S. Ignat. apud Ribaden. l. 5. cap. 10.

**G**audio, quod offert mundus, dixi: quid vanè deciperis? illud sincerum est gaudium, quod nemo tollet à nobis.

Esse sine delectatione anima non solet; vel infimis delectatur, vel summis. Illæ irritant palatum, non satiant: istæ sunt, quæ solæ animam, cum sit immortalis, explere possunt.

Ma-

Magna ars est scire gaudere. Latari in rebus pessimis, res est materia lacrymarum. Ut ignis & aqua non cohærent, ita nemo carnales unâ, & spirituales delicias gustare speret.

Vis nunquam esse tristis: semper bene vive. Ex hoc fonte pura promanant solatia, nullæ te jure affligent miseriæ, si vel unus gratiæ divinæ gradus consoletur.

## XXVIII. MARTII.

*Heu! quàm sordet mihi terra, dum cælum aspicio.* S. Ignat. apud Bart. l. 4. §. 28.

**A**D altiora nati sumus, quàm ut infimis delectemur. Naturæ beneficio licet ad altiora aspirare, quæ os homini sublime dedit, cælumque tueri jussit, & erectos ad sidera tollere vultus, magis autem corda.

Cælum patria est, terra exilium, illud beatitudinis, hæc calamitatis ferax. Sursum proinde vota! sursum desideria! hanc despice, & illud suspice.

Sordeat nobis terra, sordeant omnia ejus dona, quia bona apparent, non sunt; imò mala sunt, quia malos efficiunt, cælum impediunt.

Terræ solatia etiam pecoribus communia sunt, cæli gaudia nos Angelis æquant, illa sordida, hæc pura: brevia illa, hæc æterna. Hæc proinde appetenda, illa generoso pede calcanda.

## XXIX. MARTII.

*Qui multum metuit homines, grande aliquid pro Deo nunquam conficiet, S. Ignat. Vitæ l. 4.*

**Q**ui homines respicit, facile Deum despicit: illud idolum, quid dicent homines? à sincero veri Dei cultu nimis quàm multos avertit. Si hominibus placerem, Christi servus non essem.

Cùm timor ille inauspicatus aditum semel vitio aperuerit, nihil est, quod non persuadeat: ô perversa erga homines reverentia! quorum intuitu pudet non esse impudentem.

Quid times homines? miseri sunt, nec sibi, nec tibi aut prodesse possunt, aut obesse, invito Deo. Hunc time, qui postquam occiderit, potest animam perdere in gehennam.

In Dei causa nihil timendum, sed ut acus polaris, seu arrideant Zephyri, seu tumultuentur Boreæ, semper in polum intenta hæret, ità immotus age, quæ Dei sunt, neque ad dexteram declivis, neque ad sinistram.

## XXX. MARTII.

*Ut rudis atque informis stipes non suspicatur fingi se posse in statuam, quæ pro artis miraculo celebretur, sed statuarius videt, quid ex illo fieri valeat: sic multi, qui vix aliquid de Christiano sapere videntur, non intelligunt, se posse Dei manu in Sanctos efformari, nisi manui hujus artificis se opponant. S. Ig. vitæ l. 4.*

De-



**D**Eus solus ita peritus artifex est, ut quilibet possit ex quolibet. quia is unus, quod deest dare, quod superest, demere potest. Tu te ab eo fingi sine.

Nemo contemnendus. Esto stipes appareat, forte fingetur in fratuam, evadet artis prodigium, populorum admiratio, forte aræ imponendus, coram qua tu genua aliquando curvabis.

Malè judicat, qui secundum faciem judicat. Ut ex optimis pessimi, sic ex pessimis optimi fieri possunt. Tu tibi, non aliis attende.

Ut argilla figuli manum prompta subit, quamvis formam recipere facilis, quam artificis manus impresserit: ita tu Deo te tractabilem offer. Sine illum agere.

## XXXI. MARTII.

*Qui obliviscitur sui, & suorum commodorum propter obsequium Dei, habet vigilem pro se Deum. S. Ignat. apud Bart. l. 4. §. 35.*

**F**Ac pro Deo, quæcunque potes, & ille pro te faciet, quæ tu non potes; nec enim illi difficile est tibi succurrere nec potestas illi deest, nec voluntas. Promptior ille est ad dandas, quam tu accipiendas gratias. Nemo meliorem sui curam habet, quam qui se negligit.

Malè tibi consulis, dum tempus divinis obsequiis addictum ad alia derivas: quem

potes rei sperare succesum? si Deo displices, unde tibi erit benedictio?

Quarite primùm Regnum Dei, & cætera adjicientur vobis. Non perit tempus, quod pietati tribuitur, plus proficies orando, quàm studendo.

Frustra fatigamini! non estis vos, qui loquimini. Pater cælestis dabit vobis in illa hora, quid loquamini. Sinè quo nihil, cum quo potestis omnia, facere. In illos liberalior, qui se, & sua parùm, Deum super omnia, curant.

### I. APRILIS.

*In splendidis, & bene cultis sui contemptus, omnisque excellentiæ, & existimationis conculcatio corporis maceratione & prior & potior esse debet. S. Ig. in vita apud Bart.*

**U**T rara, ità magna virtus est humilitas honoratà: quod se myricæ demittant, quòd in humili reptent vermiculi, magnum non est, sed quòd cedrus exaltata caput inclinet, ac quàm altè fertur in sublime, tam profundas in terram mittat radices, hoc vulgare non est.

Honorem & vitam pari passu tueri, ambitionis tessera est; quàm remotum ab hoc Christi axioma! qui elegit esse opprobrium hominum, & abjectio plebis.

Qui

Qui magnus esse vult, id media sui depressione obtinebit. Si enim nihil honore sublimius orbis habet, hunc contempsisse, parum esse non potest, sic enim major fit eo, quod maximum orbis æstimat.

Verbis se contemnere vulgare jam est, etiam arrogantes id agunt, sed ut contemptus ipse contemnatur, huc si virtus assurrexerit, apicem perfectionis attingit.

## II APRILIS.

*Ut in salutem animarum effluentes sint natura dotes, interiori virtutis impulsu eas agi oportet, indeque vires ad rem bene gerendam ducere.* S. Ignat. apud Bart. l. 4.

**N**on semper ille metit amplius, qui amplius seminavit. Semen inutile nullum reddet fructum, nisi incrementum det Deus. Ubi deest spiritus, ibi semen est effectum.

Cassus est organædi labor, nisi fistulas impleverit spiritus, melos non edent. Nec Apostoli docendæ plebi se prius accinxerunt, quam repleti essent spiritu ex alto.

Vox hominis mortua est, auditur, non penetrat: nisi voci huic vox Dei societur. Frustra fatigantur latera; nisi Deus tecum loquatur, nihil proficies. Non jungit vocem Deus, nisi secum conjunctis, & hinc tam dispar tot Apostolorum fructus.

Si pulchris mentem sensus & egregiis veri-

tatibus illustres, animus tamen turpi languore iners & ignavus torpeat, si indoctus eorum, quæ doces, impellere alios ad honesta contendas, fructum à raucedine alium non expecta.

### III. APRILIS.

*Cum omnibus quidem, sed cum inferioribus præcipuè oportet esse in loquendo parcos, patientes in audiendo. Patulæ dandæ sunt aures. dum ille sensos animi sui omnes expressisse videatur, S. Ignat. Hist. Soc. l. 3. n. 48.*

**A** Mari animi querelas potuisse in fidas aures exonerare, sæpe remedium fuit morbi, qui credebatur incurabilis. Ità sæpe levasse stomachum bile, est sanitatem recepisse.

Æger audiri debet, si errare nolit Medicus: nemo patiente novit meliùs, quia nemo sentit acerbius, quid patiat. Felix Medicus, qui audiendo, si non curare, certè levare potest morbos. Crudelis, qui tam facili remedio juvare nolit.

Egeritur querelis dolor, & minuitur, dum eum audiente dividitur; maximè si afflictus non benignas modò aures, sed & amicum pectus inveniat, è quo natum molle verbum mitiget sensum doloris.

Novisse morbum curationis est fundamentum. Facilius corporis, quàm animi symptomata nosces, nisi æger prodat. Nec apta cor-

corpori Medicus, nec animo Superior pharmaca porriget, nisi patienter uterque audiat patientem.

## IV. APRILIS.

*Hæc sola ambitio iusta est, Deum diligere, & in ejus amoris præmium in amando crescere.* S. Ignat. apud Bart. l. 4. n. 26.

**A** Mor est hominis felicitas, non ille cæcus animi motus, qui falsum pro vero bono apprehendit, hic deceptor est promittit voluptatem, & gustatus dat amaritudinem; sed rationalis ille, quo verum, æternum, & incommutabile bonum amatur.

Vel atomus amoris Dei dulcior est, quàm omne, quod orbis mentitur esse amabile: hoc qui gustat, fastidit. illum nemo satis æstimat, nisi qui possidet; & plus fruendo, plus appetit.

Amare, est de amati felicitate gaudere, non fecus, ac si amans eam possideret. O quæ mea felicitas! si amo Deum, omnia divinitatis bona participo! utinam nihil cogitem, nihil agam, quàm ut amem te, Domine!

Amare Deum, est in universi centro quiescere, extra quod nulla quies, in universi circulo moventur omnia, non aliter, nec alibi quietus eris, nisi in Dei amore conquiescas.

## V. APRILIS

*Ad hominum benevolentiam divini obsequii causa colligendam, omnibus omnia fieri,*

*est necesse: nulla enim re æquè ac morum, studiorumque similitudine animi capiuntur.* S. Ignat apud Nolare.

**D**ifficilius est hominum animos, quàm arces expugnare; hæ ferro & machinis, illi nec integris exercitiis subiguntur, ad quos captivandos nullus potentior affabilitate archistrategus.

Quas aperto Marte frustra tentasses animas, has stratagemate feliciter capies, si antequam sanctiora illis documenta instilles, benevolentiam lucreris: hac enim obtenta non aures modò, sed & corda ultro præbunt; quæ duces, quo voles.

Si suaviter canentem audient Orpheum, non audient tantùm, sed & sequentur, surdæ alias & pigræ in divina cautes. Hæc innocens est magia, qua homines incantantur.

Nemo tam ferus, qui non capiatur humanitate; sermo amænior, & oculus serenior, etiam ex dura rupe benevolentiam, velut reciprocam Echo, provocat. En quàm facili impendio animas capis.

#### VI. APRILIS.

*Non reputare se debet Christi amicum, qui animas non fovet, quas ille fuso sanguine redemit.* S. Ignat. ib.

**S**I una in amantibus anima, par etiam debet esse affectus, ut, quod unus, idem & alter, diligat. Jam, si Deum amas, mensuram

ram habes, quantus in te animarum amor ar-  
dere debeat.

Ex creatis omnibus anima sola est, quam  
suo Deus amore dignatur: hanc affectu, re-  
liqua imperio regit. Vide, quid à te anima  
mereatur.

Anima est imago Dei; hunc si amas, qui  
ejus imaginem in sterquilinio hæere sines,  
cùm eruere queas? tantò pulchrior hæc ima-  
go, quanto Deo accedit propior. Detergere  
sordes, amici munus, & testimonium est.

Quanti Christo animæ constitere? sunt  
merces infiniti pretii: tanti laboris quanta  
ejus passio, fructus sunt; hæc qui non curat  
ab interitu, Redemptorem non amat. Cura  
ore, cura calamo, cura opere.

## VII. APRILIS.

*Imperium magis impatiens, quàm disciplina  
cupidum, arguit castigatio justo frequen-  
tior.* S. Ignat. vitæ l. 3. n. 36

**Q**ui singula singulorum errata vindicare  
vult, omnes tollere debet homines,  
cùm nemo sinè crimine vivat. Vitia namque  
erunt, quàm diu homines.

Sæpè malum curatur prudenti dissimula-  
tione, quod immodica cura exasperatum fu-  
isset. Multis medetur tempus, alia sponte  
veniunt ad maturitatem, ulcera & plus mali  
fontem ipsa effundunt.

Quoties pœna frequentior auxit malum!

augebitque semper, quoties pudorem pœna frequentior excusserit; quo semel pulso audet semper pejora irritatâ voluntas.

Major persæpe defectus est punientis, quàm puniendi: hic fragilitatis, ille passionis fructus est. Ex te documentum cape, quid cum aliis fieri expediat; si pro quolibet errore tibi censor incumberet, qui ferres?

## VIII APRILIS.

*Fallendi temporis causa ad te venientibus, de morte, de judicio, similibusque austeris, quæ istiusmodi hominum, quamvis insurduerint, mordaciter aures radunt, occurre: ità tibi & illis consules; vel enim redibunt meliores, vel suffurando tibi tempori deinceps abstinebunt. S. Ignat. vitæ l. 4.*

§. 20.

**N**ihil pretiosius tempore, & hujus fures sunt amici, malo sanè damnosissimo, si absque fructu, si in frivola consumatur.

Avarum hîc esse oportet, nihil temporis indulgendum sinè scœnore; si te, si aures, si linguam commodas, exige animum, recipe compunctionem census loco, fructum collige spirituales.

Esto peritus Alchimista: ex re qualibet aurum elice. De bellis, de negotiis ille materiam suggerit, tu de pace cum Deo, de uno necessario repone; sic è luto margaritam, è scoria aurum collegisti.

Lin-



Lingua ursus informem massam debitam  
in formam elaborat: hæc tibi pro penicillo  
seruiat, qua vel animal in hominem, vel ho-  
minem animale in Angelum efformes.

## IX. APRILIS.

*Mira mundo pax mecum est, dum, linguæ  
ignarus patriæ, bellum mundo tantisper  
non moveo: sine, possim in campum prodi-  
re, videbis in me totam urbem illico surge-  
re, me verò undique pugnantem. S. Ignat.  
vitæ l. 2. n. 18.*

**I**nvidus dæmon est, non sinit inultus sibi  
animas eripi, pro his se opponit, bellum  
mouet, cumque ipse in aciem prodire publi-  
cam nolit, mittit satellites qui ejus causam  
vario prætextu bellissimè tueantur. Scit nem-  
pe animæ pretium dæmon.

Quos è Religiosis pluribus peti calumniis,  
& plurium odio expositos vides, hos anima-  
rum zelotes esse scito, contra quos orcus se  
vindicat; parcit hic otiosis, pacem iis non  
difficilem concedit, à quibus & ipse pacem  
habet.

Nec idcirco cessandum à bono, quòd or-  
co displiceat, quòd mundus tumultuetur,  
quòd contradictores audias; imò fortiùs in-  
sistendum!

Aderit causæ suæ Deus; quæ mera insupe-  
rabilia putas obstacula, momento subsident,

si tu bene cœptis insistas. Potentior est orco  
gratia Dei, huic fide, & eluctaberis.

## X APRILIS.

*Nequaquam detractum crede pietatis studio,  
quod naturæ necessitati conceditur. S. Ig.*

in Hist. Soc. p. 1. t. 1. n. 30.

**M**agna hominis dignitas! ad imaginem  
Dei creatus, cœli hæres! gratiæ divi-  
næ particeps, virtutis capax, nè se extolle-  
ret, præter animam, corpore constat, quod  
suos patitur manes.

Nec perit tempus, quod curæ corporis  
datur. Dum pascitur asinus, dum quiescit,  
Domino servit: sic indulgeri quies debet cor-  
pori, ut fortius deinde labori insistat.

Misera mentis humanæ conditio, pietati  
absque cessatione, licet velit, addici non po-  
test: ut arcus intensus rumpitur, ita suum  
mens æque, ac corpus, à laboribus intersti-  
tium requirit.

Nimum qui facit, nihil facit; nam lassitu-  
dine fractus, nihil poterit. Moderandus est  
fervor, nè penitus extinguatur. Nimum  
olei si lampadi affundatur, non promovetur  
lumen, sed extinguitur. Moderata durant.

## XI APRILIS

*Ad vineam Domini suis laboribus excolendam  
iturus, humilitate sui que contemptu viam  
sibi ad ardua, atque excelsa disponat, tum  
enim reliquum ædificium tutò surget, si hu-  
mi-*

*militatis fundamento sit innixum. S. Ig.  
ap Bart. l. 4. § 2.*

**Q**ui aurum quarit, uti & qui margaritas piscatur, se demittit, hic in maris, ille in terræ viscera; nec animas alias certius quàm demissione invenies.

Nec Christus, animarum nostrarum Zelator maximus, alia eas via quæsit, quàm sui abjectione. Quantum ab hujus exemplo, tantum ab animarum lucro recedit.

Posse Deo cooperari in salutem animarum, gratiarum est maxima: hanc arrogans sui æstimator sperare non potest, nec enim dat, nisi humilibus gratiam.

Nulla vox ad persuadendum aptior sui demissione, plus hæc adjumenti, quàm integra bibliotheca dabit. Vide: quid talentis, quid annis, quid experientiæ tribuendum.

## XII. APRILIS.

*Non ideo pane Angelorum abstinendum, quòd molliores non experiamur sensus: foret enim hoc perinde, ac qui vellet inedia perire, quòd pane mellito careat. S. Ignat. vitæ l 4*

**S**icut in cibis corporalibus non semper illi magis conducunt valetudini, qui palatum suavius afficiunt; ita nec illa communio censenda est animæ utilior, quæ sumpta majorem habet teneritudinem.

Panis solidus auget vires, sacharites gustui

stui prodest, non stomacho. Solida devotio fide viva, spe firma, charitate non ficta absolvitur, teneris lacrymis, & molli affectu carere tuto potest.

Illam devotionis teneritudo, corporalis est gustus, non spiritualis: illam qui appetit, se, non Deum quærit. Puerorum delicia dulcia sunt. Cordis & animæ, non gustus & palati, cibus est Eucharistia.

Qui vulnus habet, medicinam quærit; nec sollicitus, an suavis, modò utilis illa sit. Insuper, qui medelam non admitteret, nisi dulcem.

### XIII. APRILIS.

*Ille beatè vivit, qui, quoad fieri potest, & in Deo mentem, & Deum in mente versat assiduo. S. Ignat vitæ l. 3. n. 1.*

**Q**uid habet homo ex omni labore suo? ut trochus inutili motu continuò volvitur, donec concidat; ità sinè fructu humanæ agitantur curæ, nisi in eo quiescant, ad quem conditi sunt.

Difficile est curis distrahi, & mente immobiliter in Deo hærere: sed quod potest in acu polari natura, cur in te non possit gratia? quocunque volvatur illa, seu sudum arideat cælum, seu minetur turbidum, à polo non dimovetur. Sic mobile sit fixum.

Beata mens! quæ olympi montis æmula tempestatibus quidem obnoxia est, sed vertice

tice super has altior perpetuam alit serenitatem. Hæc mentis in Deo fixæ felicitas est.

Ut soli soli oculos indulget aquila, ita unum cor hominis uni debetur Deo. In hoc habet omnia, extra quem nihil est omne, quod esse putatur, umbra boni, nec tam umbra, quam deceptio.

## XIV. APRILIS.

*Quos robusto pectore, & virtute mascula solidos comperimus, ut habemus chariores, ita exilibus etiam de navis severius veniunt castigandi. S. Ignat. vitæ l. 3. n. 36.*

**Æ**gro facilius aliquid indulgetur: qui ad modicum etiam vulneris tactum gemit, molli manu tractandus: ast in sanis supervacanea est ista sollicitudo; duris utiliter exercetur, nè ad quemlibet casum langueat.

Quos majori affectu, hos pari etiam curâ prosequimur. Amare, est bonum velle; non amat qui errata dissimulat, qui morborum vitia non succidit; doleat licet amato, modò, profit.

In pretiosioribus minùs tolerantur labe. Quodvis vitium demit margaritæ pretium. Quem amas, ita cura, ita excole, ut nævo omni careat.

Etiam parva multum nocent, ipina res exilis est, leonem tamen, nè designatam currat ad metam, multum moratur. Quanto

ma-

magis aliquem diligis, tantò vigili magis censura maculam in eo singulam persequere.

## XV. APRILIS.

*Nec sordidum, atque incompositum in te quidquam patere, sed & affectatam diligentiam, quæ mollius aliquid, & arrogantius sapit, procul habe. S. Ig apud Bart l. 4.*

**U**T suam mundities laudem, ità risum meretur superstitiosa vanitas, quæ crines in aciem locat, tingit, fingitque, & curas, Deo, ac æternitati debitas, his crepundiis impendit

Etiam in cilicio exosæ debent esse tibi sordes, nè horrore arceas, quos allicere debuisses. Sui usque ad pædorem, & sordes neglectus, ejus virtus sit, qui sibi soli vivit, & spontaneo abditus sepulchro, vivus putrescere incipit.

Quidquid sordium est, detestatur animus, qui aspirat ad cælestem illam civitatem cujus plateæ omnes aurum mundum, & sequi parat agnum finè macula.

Adi licet squalorem carcerum, nosocomiorum pædorem accede, sed ità in his, sicut solis radii in cæno, versare, invisit ille lutum, nec inficitur. Si quid tibi sordium adhæsit, mature expia.

## XVI. APRILIS

*Operarius non ad aurum tractandum, sed lutum venisse se cogitet, acuatque in sui cussis.*

*stodia curam, nè in se admittat scabiem, quàm ex aliis satagit defricare. S. Ignat. vitæ l. 4.*

**N**on opus est valentibus medico, sed male habentibus; ubi corruptio major, pestis urget acerbior, eò primùm advolet tam corporum, quàm animarum archiater; præmunitus tamen, nè & ipse vitium trahat.

Si piscator se mergat, ut unionem inveniat; si se medicus occidat, ut æger sanetur, non piscatio, non curatio hæc, sed infania fit. Idem est, qui animæ suæ labem aspergeret, dum abluit alienam.

Non obviæ virtutis esse debet, qui peccatorum conversioni operam suam vult addicere. Magnum est, quod aggreditur, nec satis tutum, nisi quasi inpeccabilis sit, alias dum minuere vult, numerum facilè augebit scelestorum

Nisi passiones in fræno habeas, cave præcipitium, quo malorum, inter quos agis, exemplum invitat, quo natura impellit. Facilis est descensus averni.

## XVII. APRILIS.

*Cave cujusquam factum criminis damnare; spectanda mens est proximi, quæ sæpe proba est, & innocens, licèt exterior facti species deterior videatur. S. Ig. apud Bart. l. 4. f. 387.*

No.

**N**oli à sensibus mutuare sententiam, si nolis errare. Testimonium horum falsum est. Cautè pariter fide cogitatu tuo, cautiùs relationi alienæ. Sed ut in nocte, nè impingamus, auxiliari lumine cavemus; ità in alienis, quod certum non vides, non judica.

Malè de aliis judicare, est malitiam suam proderè. Araneus est, qui venenum haurit è flore, unde apis mel suxisset. Stomachus corruptus omnia in bilem convertit.

Dominus est, qui judicat. Cur te misces ejus officio? ille scrutator est renum, & ponderator cogitationum, nos vix ultra spitamam, nec nisi rerum corticem videmus, & tamen Orbis Judices simus. Indè tot errores.

Magna illa dies aperiet, quàm frivola fuerint nostra de aliis judicia. Multi sunt sancti occulti, qui nihil eximium produnt foris, tantò majores coram Deo, quantò studiosius bene gesta coram hominibus celare studuerunt.

#### XVIII. APRILIS.

*Non cuiq; utilius est, quod per se est optimum; sed quid præsentibus rerum concurrentium momentis cuique maximè conducatur, observandum S. Ignat. vitæ l. 4.*

**N**ec cibus, licèt optimus, omni stomacho, nec medicina esto pretiosissima, cuique ægritudini aptè convenit; sic etiam in  
bo-



bonis vigili opus est indagine, ut error evitetur.

Si semper bona voluntas comitem haberet perspicacem, & ad omnes circumstantias vigilem intellectum, rarior in bonorum electione occurreret error, qui nunc frequentissimus est. Nulla virtus est virtus sine prudentia.

Etiam in rebus optimis alieno utendum est consilio, nisi malo tuo capere velis experientiam. Caro emitur, quæ per proprios errores obtinetur, scientia. Satius est interrogare, quàm errare.

Non omnes humeri ferendis iisdem oneribus sunt apti. Obrutuntur facile, nisi exploratæ sint vires, priusquam iis onus imponatur. Aliud est de rei bonitate, aliud de illius pro te utilitate, iudicium.

## XIX. APRILIS.

*Nec quantavis in pecunie difficultate sumptui ulli parcendum, nè quid decumbentium cura desideret.* S. Ignat. apud Nolar.

**N**on debet timeri defectus facultatum, quæ in ægros impenduntur, redibunt cum fanore: dum pascitur æger, pascitur Dominus: quod uni ex minimis meis fecistis, mihi fecistis. Hic qui parce seminat, parce & metet.

Viva Spiritus Sancti templa ruinæ proxima fulcire, nè corruant, majoris est meriti, quàm

quàm aras instaurare. Hæ, si ruant, erigī poterunt; ægri vita semel perdita non revocabitur.

Non facilè dici potest, quantum inter corporis languores animi crescat infirmitas, dum æger spe destitutum se videt: duplici sic premitur malo, morbi uno, inclementiæ tuæ altero, qui eum, quem potes, imò debes, non consolaris.

Nec est immisericordia major, quàm eum deserere, qui se juvare non potest. Qui se, suaque Deo dedit, meretur ibi non egere, ubi summa est necessitas

#### XX. APRILIS.

*Non tantùm è cæli, siderùmque aspectu, sed etiam tenuis herbula, rei que cujuslibet tenuissima conspectu confestim in Dei amorem novit evolare, qui Deum novit. S. Ig. apud Mass. l. 3. c. 1.*

**U**T ignis nativo impetu sursum fertur, ità monitore nullo, nec Duce, nec scalis cor eget, quod Deum amat, ut eò eluctetur; tacitis eò vinculis ità potenter trahitur, ut anima plùs illic se esse, quàm ubi animat, omnino experiatur.

Perspicaces sunt amoris oculi, nec corticem tantùm extimum, nec colorem attendit: rimatur acutiùs, medullam intrat, & è re creata ducitur ad creatorem. Ubi amor, ibi oculi, seu corporis, seu mentis.

Sol oculis eripi potest, sed non Deus: amanti ubique videtur. Etiam cum dormit amans, ejus cor vigilat, & illie assistit præfens, ubi amat, nulla intervalla spatii, tenebræ nullæ aut obices iter hoc possunt impedire. Ubi thesaurus tuus, ibi & cor tuum.

Cujus oculi colore aliquo suffusi sunt, idem color semper oculis obversatur, quidquid demum aspiciat; ita qui Deum solum amat, solum novit, ille solum ubique invenit, ubique videt.

## XXI. APRILIS.

*Ama etiam perditissimos: ama residuam in iis Christi fidem, si, & hac carent, ama virtutes, quibus desituuntur: ama sanctam, quam gerunt, imaginem; ama Christi sanguinem, quo redemptos credis. S. Ignat. apud Bart. n. 20.*

**O**Mnes quidem, scelerati tamen maxime, tenera sunt fovendi charitate: hæc enim unica restat via, quâ meliorem ad vitam revocentur. Non respiscunt, nisi amati.

Facilior animi, quam corporis morborum est medicina: illi amore trahuntur, & manum medicam, si amica sit, admittunt. Quam beati forent Medici, si amando agros curare possent!

Mira, vera tamen res! ad aliorum odium, & nostri amorem! pronissimi, ad aliorum vero amorem & odium nostri difficillimi sumus!

naturam nempe cæci sequimur, non expendimus rationes.

Inhumani prorsus in homines sumus! subito odium subit animum, importunè manet, lentè, aut vix exit, magna vi evelli est opus: fortissimas radices agit. Absit à te maligna pestis charitatis.

XXII. APRILIS.

*Mundi contemptum Christi casu professus patriam in mundo habet nullam, quam agnoscat pro sua. S. Ignat. vitæ. l. i. n. 7.*

**M**ENS nata cælo libera est, nulli affigitur patriæ. Vel totus illi orbis patria est, vel totus exilium. Particulari affectu, velut vinculis, non sustinet alligari. Omnibus altior.

Trunci adeò tenaciter terræ, in qua nati sunt, adhærent, ut avelli, nisi vi, non possint. Sed & tunc non sinè terræ hiatu, quasi ore aperto, in querelas effunditur; eùm tamen transplantati uberiores fructum ferant.

Quæcunque Patria tua sit, lacrymarum vallis est, est mille miseriarum theatrum; ridiculum! quod ità pertinaci affectu ei adhæreamus! nullum patria bonum, nullum facit malum.

Propheta non est acceptus in patria. Quid si extra patriam facilior sit ad cælum via? vel enim desunt obstacula parentum, aut cognatorum favores, vel deficiente in suis spe,

vic-

virtus crescit, ut Martè quis suo evadere possit. Nos patriam, quo tendimus, amemus.

XXIII. APRILIS.

*Si contingat te pati, quidquid Deus velle, aut huius permisso demon inferre possit, speranda tamen in Deo victoria. S. Ignat. apud Quartem, in Gl.*

**P**remi te finit Deus, non finet opprimi: premit, quia te diligit; tibi providet, ut longè mitiori pœna hic expies, quod in altera deberes longè graviori.

Premi te finit Deus, tamen amat. Exercet in te jus, quod habet Dominus; premit, favorem tamen non exuit, manet pater, plis de te, quàm ulla mater de filio suo sollicita.

Premi te finit, & multùm & diu, quia multùm amat. Premit, ut meritorum cumulum augeat, & præmium, quod otioso non posset, bene merenti conferat.

Premi te finit, ut tuum amorem acuat, & spem experiatur. Vide, ne suâ Deum fraudes expectatione. Spera, multùm spera. Spei quippe magnitudo est obtinendarum mensura gratiarum.

XXIV. APRILIS.

*Nolo in iis, qui presunt, animi motus, iræ potissimum extinctos, planèque mortuos, sed probè domitos. S. Ignat. vitæ l. 3. n. 36.*

**E**tiam venena profunt ritè attemperata. Usus rem bonam vel malam facit. Ità

rectè adhibitâ nihil laudabilius, eâ carere, non est virtus, sed languor, & segnities.

Ira est Reipublicæ & omnis communivitatis fulcrum, sinè qua disciplina solutio, laxitas morum, libertas, scelerum impunitas, audacia, oriuntur.

Affectibus uti debemus, prout Domini servis; subesse debent rationis imperio, non præesse, officio suo fungi, vel defungi debent, non prout volunt, sed prout jubentur; ubi dominatur ratio, servit ira, hæc dum servit, bona est.

Qui malis irasci nescit, cum deberet, præcipuam regiminis partem negligit: qui parit scelestis, crudelissimè sævit, uni blanditur, omnibus nocet. Rei pater, communivitatis tyrannus.

#### XXV. APRILIS.

*Quidquid aliunde, quàm à Deo, & ratione Instituti tui dicitur, tentatio est, suspecta res esto* S. Ignat. apud N. lar.

**Q**uantùm fabrica declinat à regula, tantùm inclinât ad interitum. Regula est cui accommodari debent omnia. Cæterum non erigitur ædificium, sed cumulus paratur ad ruinam. Idem esto de spiritali vitæ fabrica iudicium.

Regula sit norma vitæ, sit singularum actionum amussis. Ut enim errat, & nobilis etiam structuræ decorem tollit, quisquis  
à re-

à regula exerrat lapis: ita quævis actio regulæ difformis ordinem impedit: dedecori est, non utilitati.

Nec à vulgi opinione patrocinium quære: peccat facilè multitudo: ponderanda potius, quàm numeranda veniunt iudicia. Indignus censetur ratione, qui mavult credere, quàm iudicare.

Deus benedictionem Instituti tui regulæ alligavit; hac ad unguem servatâ, succedent omnia: rejecta, nihil. Nec revelationi danda foret fides, si aliquid à regula tua alienum suaderet.

## XXVI. APRILIS.

*Non minus miraculum est, videre mœstum Religiosum, qui aliud non querit, quàm Deum, quàm videre lætum, qui omnia alia querit præter Deum. S. Ig. apud Trinkel. in exercit*

**I**bi solidum potest esse gaudium, ubi possidetur summum bonum; in hoc uno est flamma sinè fumo, aliæ rosæ spinis horrent, & gaudia mœrore confunduntur. Virtutis nempe pedissequa est constans mentis lætitia.

Ludi, musica, spectaculorum varietas, infirma sunt gaudiorum artificia. Obstacula dolori esse possunt, sed ad tempus. Suspendunt potius, quàm tollunt animi mœrorem, qui facilè recrudescet, nisi repererit in bono immutabili medelam.

Illi tridentur, qui spem cœli non habent; qui sese suis passionum iactandos permiserunt; nos, quibus cœlum stipulatò promissum est, sinceræ lætitæ fontem gustamus, quam nemo tollet à nobis, quàm diu corde Deum non sustulerit.

Non contristabit justum, quidquid ei acciderit, quia scit, Deum diligenti omnia in bonum cooperari. Sic tenebræ serviunt luci, & umbra colorem magis spectabilem facit.

## XXVII. APRILIS.

*Hominem usu rationis præditum non solum ita frenare convenit passiones, nè verbo, factove erumpant in publicum; sed etiam ita regere: ut nihil ex impetu, omnia ex ratione operetur. S. Ignat. apud Mass.*

**I**nsipiens planè navarchus, qui navim suam ventis & fluctibus permittit, quo quo his libuerit, impellendam. Quem, sic raptata, portum tenebit? fluctus hi sunt cupiditates tuæ.

Hoc unum hominis à pecude discrimen est, ratione agi, & agere; hoc si desit, nescio, quid hac ille melior sit. Ratio norma sit, secundum quam prudens architectus vitæ tuæ structuram ducas.

Impetus dux cæcus est, cæca pariter voluntas: væ si cæcus cæco ducatum præstet! Impetus est equus sine fræno navis absque remo; quorsum ista? nisi in præcipitia, nisi in naufragia?

Quò



Quò certior regula, eò feliciùs surgit ædificium. Ratio, quæ te, ac tua dirigat, æterna sit, ab hac nec latum unguem recede. Si te ducant alia, seducent.

## XXVIII. APRILIS.

*Cavete, ne filii hujus sæculi majori curâ, & sollicitudine in caducarum rerum, quàm vos æternarum affecutionem incumbant.*

S. Ignat. ep. de perf.

**M**isera mortalium conditio! in ea, quæ nocent, semper pronior! cum ægris nihil avidiùs expetimus, quàm quæ gravissimè officiunt; nec horremus amplius aliquid, quàm quod foret utilissimum.

Labor omnis gratus est, præter illum, qui virtuti assequendæ impendendus esset. Fatigia mercatorum, militum pericula, studentium vigilia, inertia nos convincunt, quâ lucra terrena æternis, id est, umbram rei præhabemus.

Faciliùs sæpe foret cælum obtinere, quàm perdere. Minori virtus, quàm vitium labore nobis constat. Jugum Christi suavius, & onus levius est, quàm nostrarum cupiditatum, & tamen ô vesaniam! Sudores, & pericula nostra deperimus.

Si decima pars conatûs, & temporis, quam avarus temporalibus lucris impendit, æternis daretur, quàm grandibus in virtute pas-

sibus procedereimus! quàm facilè sancti essemus!

XXIX. APRILIS.

*Meliùs est parùm bene fundatum, & durabile, quàm multum incertum, & malè securum; S. Ignat. ibid.*

**Q**uæ amitti possunt, bona vix dici possunt; possessa cruciant, curas pariunt, rosam unam plantant, & spinas plurimas alunt. Cælum nos non satiaret, si perpetuum non esset.

O spes, & res hominum inanes! qui fortunam sibi pollicebantur stabilem, & adamantino nexu obligatam, momentò intentionibus, desideriisque suis inimicam experiuntur. Misera felicitas! quæ metu futurorum amaram reddit omnem, quæ haberi potest, voluptatem.

Æternitas sola est, quæ finem nescit, cuius gaudia nemo tollet à nobis. Quæ amorem nostrum merentur, æterna sint, nullum reliqua operæ pretium faciunt.

Quidquid deliciarum mundus habet, minimâ sui parte ne afficiunt: vel enim transiverunt, & hæc non recreant; vel ventura sunt, sed hæc incerta. Ità plus mœroris, quàm voluptatis habet omnis voluptas.

XXX. APRILIS.

*Quidquid sinè voluntate, aut consensu animæ moderatoris fit, vana gloriæ deputabitur, non mercedi. S. Ig in ep. de ob. Ne-*

**N**emo sibi satis sapit; ut oculus, etiam perspicax alios, non seipsum, videt; ita prudentia etiam insignis aliis, non sibi sufficit. Qui alios novit regere, sui regimen committat aliis, est necesse.

Voluntas propria fermentum est, quod operi etiam bono admixtum totum inficit. Tantò plus valoris accedit actioni, quantò hæc magis recedit à propria voluntate. Quidquid hæc suaserit, suspectum habe.

Subtilis est amor proprius, excidium virtuti per cuniculos parat, te iudice tamen reus non agetur, evadet supplicium, ad aliud deferendus est tribunal.

Tu de aliis, alii de te judicent. Tunc remotior futurus à periculo, si de te, sine te statuunt. Nemo sibi medetur ipsi. Ægritudo animæ difficilior est, quàm corporis.

## I. MAJI.

*In ferendo de legendis rebus iudicio, hærendum non est in fuco, quem præferunt, sed prospiciendum, quò desinant.* S. Ig. apud Nolar.

**E**rrant, qui non à fine incipiunt. Exitium citiùs, quàm exitum allatura sunt negotia, quæ sinè matura deliberatione ex impetu sunt inchoata. Hæc quidem ubique, in salutis tamen negotio, ubi æternus error est, maximè necessaria.

Qui timet pericula, non peribit in illis. Præstat etiam tuta timere, quàm de incertis præsumere. Audacia infelix est consiliaria. Melior est dubius eventus cum maturo consilio, quàm felix cum temeritate.

Prævisa minùs feriunt; esto enim præter voluntatem, non tamen præter opinionem eveniunt. Si eximere te calamitatibus non potes, potes erroribus. Mala enervat cautela prævidendi.

Oculum scepro præfixum tutò sequuntur populi: nos in manibus & pedibus oculos habere convenit, ut quid agamus, quave tendamus, videre liceat. Non satis oculatus est, qui videt, ubi sistit, nisi aliò, quo tendendum sit, examinet.

## II. MAJI.

*Duplici nos via instituit Deus, unâ per se, quæ quia occulta, ideo ignota, alterâ instrui per hominem sinit. S. Ig. apud Bart. l. i f. 22.*

**U**T spinis, ità difficultatibus plena est ad cælum via; felix, qui hic peritum natus est ducem, finè hoc facilis descensus averni, prònum est præcipitium.

Ignota Deus voluit nobis consilia sua, ut sollicitudinem acuat. Docere ipse renuit, ut fidei præberet exercitium, imò ut augeter meritum, homini nos, non sibi obedire voluit.

Loquitur sæpe in corde Spiritus, sed non omnes capiunt verbum istud. Delicatas requi-

quirit aures, in sibilo auræ tenuis sua sensa  
revelat: vox tenuis à passionum tumultu fa-  
cile discutitur, ideo egemus interprete.

Cum simplicibus sermocinatio ejus. Qui  
ambulant in mirabilibus supra se, non spe-  
rent ejus alloquium. Revelat ea parvulis,  
quæ occultit arrogantibus.

## III. MAJI.

*Præstat beatitudinis incertum vivere, & Deo  
interim, ac proximorum saluti servire,  
quàm certum ejusdem gloriæ statim mori.*

S. Ignat. apud Biderm. l. 2. c. 3.

**H**actenus Dei fruitione melius nescivis  
aliquid: Deo, & proximo servire. Amare  
quidem Deum, eoque frui, nobis dulcius,  
propter illum laborare, illi gratius est.

Qui sic amat periculum, procul sit à peri-  
culo: periculum enim non temere, sed Dei  
causa qui subit, majus à Deo auxilium, gemi-  
natamque gratiam refert, quàm protectus, quod  
metuat, non habet.

Hoc est sincerissimè Deum amare, qui ama-  
re solus renuit, nisi à pluribus ametur. Ut  
ignis sociatus ignibus urit intimiùs, & spe-  
ctabilius lucet; sic amantium multitudo au-  
get amorem, & meritum multiplicat.

Omne bonum communicivum est sui,  
maxime verò æternum; hoc sibi cum aliis  
commune facere, est sua in cælo gaudia mul-

tiplicare. Quanta solatii æterni seges, plurimos conatu suo cœlo intulisse.

## IV. MAJI.

*In rebus humanis minis accuratè versari, jure forsàn ignoverit quispiam, at immortalis Deo servire negligenter, id verò nullo pacto ferendum est. S. Ignat. apud Maff. l. 2. c. 3.*

**B**ONUM, nisi bene fiat, boni nomen amittit & pretium; Majestatis immensæ non tam cultorem, quàm irrisorem se ostendit, qui opera ei propria, vel ejus causa suscepta obiter facit. Principes sæculi quàm reverenter sibi serviri exigunt!

Maximus rerum etiam optimarum hostis & corruptor est, longus usus. Quod sæpe fit, abit in consuetudinem; hæc sociam trahit negligentiam. Præstat rem sanctam intermittere, quam non sanctè tractare.

Quantùm perdimus negligentia! quàm ingens ex hac lucrum cessans; imò quàm grande damnum emergens! qui mollis est & dissolutus, frater est opera sua dissipantis.

Seminamus multùm, & metimus parum, quia multa, sed oscitanter agimus. Gratius Deo est modicum bene, quam multum ignavè factum. Non verba Deus curat, sed ad-  
verbia.

## V. MAJI.

*Deus perspicax trapezita, magis ab operibus.  
quàm à verbis amorem æstimat. S. Ignat.  
in contempl de amore Dei.*

**A** Mor sinè opere, arbor foliis plena est,  
sed sinè fructu, jactantiam habet, non  
emolumentum. Opera loquuntur amorem,  
non verba; habent illa linguam suam, habent  
etiam, hac tacente, facundiam.

Una lingua, duæ manus nobis à natura  
obtigere: plus nempe agere, quàm loqui nos  
voluit. Mortua vox sinè opere. Universa  
sinè amore nihil valent. Amor sedem non in  
ore, sed in corde fixit.

Sape amori ficto & vero idem est color,  
paria verba, ità ut fucatum à sincero agrè  
discernas. Sic homo potest homini illude-  
re, nullus Deo. Hic perspicit intima, qui  
novit omnia.

Nucleus donorum animus est; illud so-  
lùm cœlo acceptum, quod ille, non quod ma-  
nus dant; à minùs habente, sed plùs amante  
majoris fit donum minus, quàm majus à mi-  
nùs amante.

## VI. MAJI.

*Tria sunt indubia Religiosæ domùs ritè in-  
stitutæ indicia: si clausura, si munditia. si  
lex silentii exactè observetur. S. Ig. apud  
Lancic. opusc. 5. c. 4.*

**Q**Uò promiscuè omnibus patet accessus, turbas illuc cieri, sordes inferri sanctæ quietis, otia perturbari, est in propatulo. Urbs sinè custodia hostium est suorum ludibrium.

Munditia, virtus Angelica, odit inquinamentum, nec id solùm in anima, sed & in iis, quæ sub manus & sub oculos cadunt. Exterior hæc interioris nota est, & animi ad ingenuitatem educati character.

Lex silentii legum omnium est compendium, ubi severior illius observantia, solidior illic virtus, major ædificatio. Ubi minus verborum, ibi plus prudentiæ, tam sanctæ, quàm profanæ.

VII. MAJI.

*Contra id vitium capeſſenda ſunt arma, quæ note præcipuè urgeri ſentis, nec antè canendum receptui, quàm illud, Deo duce, debet laveris. S. Ignat. apud Maſſ. l. 3. c. 1.*

**U**T longus, ita inanis labor est, folia carpere, vel minutatim noxiæ arboris ramos præcidere, etiam putata revireſcet, niſi ea penitus evellatur. Securis applicanda radici, unde malum omne progerminat.

Implacabile debet bellum, intercedere te inter & vitium illud, quod tam diu calcaneo tuo inſidiabitur, quamdium vita ſupererit. Non morietur hoſtis ille, niſi te mortuo. Ut ille ſemper in armis, ita tu ſemper eſto in vigilia.

Con-



Contra multa simul vitia decertare, est omnibus indulgere. Nec Hercules contra duos. Unum designandum est, quod in singulare certamen deligas, alias nullum vinces.

Ut capite succiso membra omnia concidunt: sublato duce dissipatur exercitus; ita causa morbi sublata facillè tollentur symptomata. Si princeps passio debilitata sit, innumeri defectus emanabunt.

## VIII. MAJI.

*Quisquis occultè improbus eos inter vitam degit, qui probitate delectantur, multò illic tempore durare non potest. S. Ignat. apud Bartol. l. 4 § 37.*

**V**Æ sepulchris dealbatis, quæ candidum foris colorem mentiuntur, intus plena putredine. Hypocritam nemo diligit, non homo, quia societatem humanam tollit; non Deus, quia veritas est.

Minus semper malitia palam nocuit. Dum ignis in publicum erumpit, concurrunt undique, media, ut sopiatur, offeruntur, at, quamdiu latet, impunis nocet.

Qui fallere vult omnes, justo Dei iudicio fit, ut ipse fallatur maximè. Fidem, quam non invenit, nemo prudens reddit. Astus astu luditur, & larva personato, nihil simile cogitanti, detrahitur.

Deus non fallitur, rimatur intima. Frustra sunt tenebræ, & latibula, oculus ille omni-

niscius ubique penetrat. Cave, personam pone: alias, percutiet te Deus paries dealbate. Esto quod appares, aut appare, quod es.

## IX. MAJI.

*Quem iræ vexat intemperies, malè se aliorum consuetudini subtrahit: hæc enim vitia non fugiendo, sed resistendo vincuntur. S.*

Ignat. in Exer.

**D**iffertur malum, non aufertur, quàm diu iræ jura non dictat ratio; sub hujus illa jugum mitti debet, secus te subjugabit. Quàm diu vel scintilla gliscit, pronum est incendium timere.

Modico opus est pyrio pulvere, ut flamma nascatur è scintilla: sic occasio quævis iræ tuæ vires dabit. Licèt unam occasionem fugias, aderit alia, omni, si carere velis, extra orbem eundum erit.

Nec in illa occasione, nec in illo, quem fugis, socio, sed in te malum latet: in pectore foves belluam, quocunque iveris, tecum ambulat. Non locum proinde, nec socium, sed te, & mores muta.

Quamdiu vivet hydra hæc domestica, tutus non vives à vulnere, adimendæ sunt ei vires, capistrum ori inferendum, sic securus cum quovis conversaberis.

## X. MAJI.

*Mulierum, etiam earum, quæ spirituales sunt, vitanda familiaritas, quarum è consuetu-*

*di-*

*dine vel fumus sequitur, vel flamma.* S. Ig.  
apud Bartol. l. 4

**Q**ui calefieri renuit, ignem non accedat,  
hic enim etiam in nolentem diffundit  
calorem. Cur appetis ibi agere, & versari,  
ubi vel perire debes, vel vincere.

Ut cum hostibus, ita cum mulieribus con-  
versandum. Illi cervicem, hæ cor petunt;  
apertis illi armis, hæ occultis pugnant. Ma-  
jor ab his, quàm illis metus, quia certius exiti-  
um.

Si fructus, qui sperari, & damna, quæ me-  
tui possunt, æqua lance pensentur, hæc illis  
longè præponderant. Cedros libani deiecit  
hæc pestis, de quorum casu tam parùm ti-  
mendum erat, quàm de casu Antonii.

Quantos leones domuit una infirmitas de-  
licata! affectus, qui spiritualis est, facilè de-  
generat in sensualem; nihil citiùs putrescit,  
quàm caro, & sanguis. Hic sibi, qui fidit,  
consistit in lubrico.

#### XI MAJI.

*Angelos in iuvandis proximis oportet imita-  
ri, qui in procuranda hominum salute nul-  
lum prætermittunt genus industriae, ex suc-  
cessu autem, quisunque sit, nihil beatæ suæ,  
æternæque pacis amittunt.* S. Ignat. apud  
Ribaden. l. 5 cap. 11.

**S**i nunc irritus videtur cecidisse conatus,  
fortè dabit fructum in tempore. De nul-  
li.

lius etiam pessimi salute desperandum, quam diu vivit, & spirat, viator manet. Quod unus, vel alter non potuit conatus, tertius efficiet. Curam Deus præcepit, non curationem proximi. Seminare nostrum est, Deus est, qui dat incrementum.

Si infra desiderium cadat eventus, cadendum non est animo; præmium non deerit, quod Deus voluntati, non operi, conatui, non successui, præparavit.

Si fructus longo labore partus, & in spem egregiam largo sudore educatus repentino fortè turbine convulsus momentò pereat, te non perdas. Adora fines Dei, tibi ignotos, tuis tamen meliores.

Si centesimus operæ fructus respondeat, & hic partem mercedis accipis, solatium laboris; hoc ut laborem, ita & meritum imminuit.

## XII. MAJI.

*Malo Dei servos virtute præstare, quam numero, & re magis ipsa, quam nomine cultuque distingui.* S. Ignat. in Hist. Soc. l. 5.

**M**agni exercitus magnis cladibus sunt obnoxii. Virtus non in censu, sed in fortitudine, hæc non in numero, sed animo consistit. Ut sol unus mille stellis amplius lucet, ita fortis unus præ mille fungis robur alit.

Ipsa copia res vilescunt, & facile satieta-  
tem, imò contemptum parit, quod obvium,

&

& semper est ad manum. Raritas pretium facit.

Multitudo sibi met gravis, prona est ad confusionem; facile unus officit alteri, & qui auxilio esse debebat, fit impedimento.

Non semper melius fit, quod à pluribus; quod in commune curatur, in communi negligitur. Plures Medici pejus curant. Eunt in diversa, sæpe contraria consilia; perplexum citius faciunt, quàm sanum. Tu talis esse conare, ut sis unus pro mille.

## XIII. MAJI.

*Eamus alacriter, securi, crucem quæcunque ferenda sit, sine Christo minimè futuram, ejusque præsidium adfore semper nobis hostium omnium conjuratione patientius.*  
S. Ignat. apud Bart. l. 2.

**R**udis & indoctus patiendi patitur, qui didicit pati, sine vulnere, imò sine sensu vivit; quibus commovetur ille, lætatur iste, sub quo onere alter gemit, exultat iste. Tantùm interest inter volentem & nolentem pati.

Præparandus ad dura animus. Sæpius in die quid dolere, quid sustinere possis, occurrat. Prævisa minus, voluta nihil, ferient. In manu nostra est, parum, aut nihil pati.

Sua crux habet solatia, his uti si sciamus, nulla nos adversitas faciet infelices. Post-

quam

quam Christus cum gaudio sustinuit crucem, omnem huic sustulit amaritudinem

Filius Dei non fuit sine cruce. Crux non erit sine Christo, si hanc velut ex ejus manu dono submissam accipias, si ejus imitatione feras. Quisque suæ vel crucis, vel fortunæ faber.

## XIV. MAJI.

*Vestis tua, ut quadret, sit honesta, sit ad usum loci, in quo vivis, accommodata, sit status tui professioni congrua. S. Ignat. vitæ l. 3. f. 211.*

**Q**ui ex veste quærit æstimationem, alio se carere pretio, satis docet. Tu vestem, non te vestis ornet. Parùm interest glabra, an scabra sit concha, quæ tegit margaritam; huic pretium illa non detrahet.

Quam miser, qui à manu sartoris, aut argentarii arte mercatur famam? quid illa vestis pretiosa, quam appetis? quid sericum, & purpura? sunt vermium excrementa. Nobilis scilicet gloriandi materia.

Vestis perpetuus est ignominie character, Adamo in pœnam peccati data, per quem cum traduce peccato ad filios vestis necessitas descendit. confussionis potiùs, quàm gloriæ argumentum.

Ut tegat, ut à frigore, ac reliquis cœli injuriis corpus tueatur, non ut ornet, ut superbiæ serviat, vestis data est, cur hanc detorques ad vanitatem?

## XV. MAJI.

*Si pulsus pravorum affectuum insolenti animi ad scelus cacodæmon proritet, remediis quoque insolitis spontaneæ afflictionis, præter consuetas, occurrendum S. Ignat. apud Bart. l. 3. f. 218.*

**U**T clavus clavo, sic insoliti morbi non solitis pellendi sunt medicinis; ubi discrimen certius, potentiora illis apponenda sunt subsidia. Contraria contrariis eliduntur.

Nec in numero, nec in viribus tentationum succumbendum. Semper cælum orco, gratia dæmone potentior est. Nec sinet te Deus tentari super id, quod potes.

Pejor est bello, timor ipse belli; nihil periculosum magis, quam hostem formidare. Si times jam meliore tui parte victus es. Animositate nostra examantur hostes; dum nos assurgimus, tum illi cadunt animo.

Si multi, si frequentes te hostes impetant, crede tibi suggeri materiam victoriæ. Coronare te vult Deus, quod ille non posset, nisi hostes tu sentiret.

## XVI. MAJI.

*Caveant, qui regunt, nè suos asperitate à se faciant alienos: vel suspicio severitatis nocet. S. Ig. apud Bart. l. 3. f. 265.*

**Q**ui duris asperantur, illi mollioribus cedunt remediis. Adamas immobilis perstat sub ictibus, ad tepidi sanguinis contactum du-

duritiem oblitus, in omnes, quas volueris, partes secedit.

Nobilior indoles tam parùm asperis tractari, quàm parum leo catenis vinciri se finit, rumpet has, qui tenui filo duci se finet.

Homines tractamus, non belluas, quando hæ humanitate regi volunt, quantò magis illi abituri in feras, nisi pro naturæ ratione gubernentur.

Non longus morum præses metus est; nec diu, nec feliciter, illos moderatur. Ut ignis violentè compressus ruinas agit, qui mollius habitus in fumum sinè damno abivisset. Qui timetur, timeat sibi, ac disciplinæ.

## XVII. MAJL.

*Religionem ingressurus sciat: non fore sibi perpetuam, & quietam illic sedem, nisi perde conjunctim utroque, voluntate nimirum, & iudicio limen transfiliat.* S. Ignat. ibid. l. 3. f. 270.

**A**Cephalum esse oportet Religiosum. Christus Religiosorum Alpha, in capite libri de se scribi voluit, ut faceret voluntatem Patris: hoc nempe caput & summa vitæ arcioris est: caput posse subicere.

Nec gravis esse potest, hæc parendi promptitudo, nisi remuenti. In cuiusque manu fitum est, ut jugum sibi reddat suave & onus leve. Si velit, quod superior, facilia fient omnia.

Nullum intolerabilius inobedientis iugo quod



Quod vult, non potest; debet, quod non vult  
Perpetuum martyrium, idque sine merito, bis  
patitur, & à se, & à præside.

Cera instar mollis, facillique manu tracta-  
bilis semper lætus, formas in omnes fingi se  
finit, digiti nutum sequitur, nec lacertum ex-  
pectat.

## XVIII. MAJI.

Fovendo infirmo quidquid peculii adest, im-  
pendatur; nos qui rectè valemus, si alia  
non suppetant, duro pane facile vivemus.

S. Ignat. apud Bart. l. 3. f. 274.

**L**iberalitas suis semper digna encomiis, re-  
ipsa major fit, si in ægros diffundatur;  
hæc debitorem facit Deum, nec est, quòd ti-  
meat paupertatis angustias, qui in ægros libe-  
ralis extitit.

Magna pars mali tollitur, si liberalem æ-  
ger affectum experiatur; nec leviter mitiga-  
tur dolor, si eum cum compatiante divisum  
advertat.

Geminum malum est, si corporis infirmi-  
tas animi secum trahat ægritudinem: quam  
turpis creat parsimonia. Sic enim afflicto ad-  
ditur afflictio.

Si, quod pronum est, erroris aliquid æger  
committat, non ægro, sed ægritudini adscri-  
bendum: corporis namque indispositio, fa-  
cile transit ad animum, & physicum nimis  
quàm sæpe agit in morale.

## XIX. MAJI

*Tanta in Deum niti oportet fiducia, ut mare ipsum, si navis deesset, nuda se in tabula speraturum credat. S. Ignat. ap. Maff.*

**T**anta est Dei potentia, immensa libertas, ut humana spe, quantacunque sit, minùs exhauriri, quàm mare tenui cochleari possit.

Minùs accipimus, quia minùs speramus, accepturi multa, imò plurima, si tantundem sperare didicissemus. Non Deus, sed pusillæ spes nostræ, nos pauperes faciunt.

Tentandus quidem non est Deus, nec expectanda miracula, ubi nulla urget necessitas, sed ubi divinæ voluntatis arcana nobis patent, quod à nobis, est agendum strenue: reliqua ita firma spe committenda Deo, quasi media omnia præsentia videremus.

In causa Dei necessaria nunquam deerunt subsidia; vel, si desint hæc, aderunt prodigia; prodigiis omnibus majus, & hæctenus inauditum foret, spem ope divina destitui.

## XX MAJI.

*Cum superior aliquid tibi præcipit, non vetat te prudentia uti. S. Ignat. vitæ l 3 f 281.*

**N**on adeo stupida virtus est, ut in iis ratiocinationem excludat, quæ cum non desiniverit obedientia, exequentis industriæ, circumspeditionique permisisse censerit debet.

Ut jussa promptè, ut sine causarum inda-

gine cæce impleas, urget obedientia; sed ut in circumstantiis ab ea nec imperatis, nec prævisis tibi noxius, proximo gravis sis, illa non jubet, sed tua indiscretio.

Imprudencia grande malum! ubique cum bruchis impingit. Ejus emendatio vel omnino sine spe, vel carò nimis, id est, multis emenda erroribus.

Discretio ubique, in via virtutis tamen maximè necessaria, quantò res intenta pretiosior, tantò damna sequi possunt graviora. Quod corpus absque oculo, hoc opus est absque prudentia.

## XXI. MAJI.

*Miraculum sanè fuerit maximum, si desit Deus sua ope iis, qui sua ejus amore reliquerunt.* S. Ignat apud Bart. l. 4. f. 345.

**Q**ui electione, non turpi necessitate, pauper est, non egebit. Ferulis ager Dei manus est, quidquid in eam reponis, fructum reddet centuplum.

Plus dat voluntaria paupertas, quam fortunæ prodigalitas dare, imò quam avaritia nostra desiderare possit; dat enim: nihil appetere; quo habito, plus possides, quam haberi possit.

Aliud est beatum, aliud divitem esse; felix est, qui nihil cupit: qui multa habet dives est, & fortunatus. Majus autem quid felicitas est, quam fortuna. Deus felix est, non

tamen fortunatus, sed felix non tam ideo, quòd habeat omnia, quàm quòd nihil cupiat. Vide quàm Divina res paupertas sit?

Quidquid natura deberet, aut fortuna dare posset, utrumque superat paupertas; utraque ditior: plus quippe illis, quàm huic deest.

## XXII. MAJI.

*In eum dives gradum enitatur, ut possessor sit eorum, quæ possidet, nec ab iis possideri se sinat.* S. Ignat. apud Nol. c. ult.

**I**ritis votis fatigantur mortales! consequi opum dominium non valent: ab ipsis possidentur rebus; hæ dominantur, voce vulgi, dominis, ità subsunt, qui præesse debuissent.

Quisquis amat, servit; quantò plùs amantur opes, tantò gravior eorum servitus. Ità qui heri futuri erant, mancipia fiunt. Parùm interest, ferreis, an aureis catenis vinciantis, si libertas amissa est.

Illa in opibus pejor servitus, dum coacervamus bona fortunæ, obnoxii sumus malis gratiæ; temporalia quærimus, id est, gradus ipsi struimus, per quos in animæ damna, utinam! non æterna, præcipitemur.

Si opes propter Deum relinquere durum esse non debet, secus divitiis, ut affine cum vitiis nomen, ità par ab utrisque timendum foret exitium.

## XXIII. MAJI.

*Precandi studio deditis par periculum faciunt  
successus, & ariditas: illo proclive est, ut  
animus intumescat; hac facile ad tedium  
provocatur. S. Ig. apud Bart. l. 4. f. 379.*

**N**ulla re magis, quàm oratione egemus;  
hæc vitæ melioris anima est; nec ulla  
tamen in re sæpius bonis mentibus dæmon  
illudit. Sic optima maximis periculis sunt  
obnoxia.

Quæ sublimia, quæ præter ordinem rara  
sunt, non pete; plus habent periculi, quàm  
emolumentum. Quidquid recedit à vulgo, ac-  
cedit ad fastum. Medio tutissimus.

Quanti hostes orationis? distractio minu-  
it, exsiccatur ariditas, curæ morantur, impedit  
dæmon, & quod mirandum magis, ipse suc-  
cessus corrumpit, & gustus enervat.

Tunc oratio Deo grata tibi utilis erit, si  
humilis, si à communi modo non degeneret,  
alienum potius ductum, quàm tuum sequatur  
appetitum. Non semper prodest, quod  
sapit.

## XXIV. MAJI.

*Non sumus domini corporis, sed Deus; ideo  
ejus afflictiones unâ singulis mensura divi-  
di non possunt. S. Ignat. ap. Bart. l. 4. f. 381.*

**U**T domini non sumus corporis, ita ser-  
vi esse non debemus, nec ejus paren-  
dum

dum cupiditatibus, nec necessitatibus aliquid subtrahendum.

Nobilis jumenti curam nobis impositam credamus; foveri debet, non ultra modum, nè recalcitret; nec infra, nè oneribus impar succumbat; sentiat calcaria, nè otio torpescat, sed & freno revocetur à præcipiti cursu ad quietem.

Facilius est flagris verberare corpus, quàm ferocem flectere voluntatem; cingi hispido cultu tam durum non est, quàm si cingat te alius, & ducat, quo tu non vis. Multa sunt, quæ corporis macerationi præstant.

Omnis, & hæc potissimum virtus consistit in medio, ut nec omittatur necessaria, nec cum valetudinis periculo accumulatur nimia corporis castigatio. Fortè plures in defectu, quàm ejus excessu deficiunt.

## XXV. MAJI.

*Usitatum est demoni, foris, quàm domi res potius gerere: contra Deus interius magis, quàm exterius hominem elaborat, & excolit. S. Ig. ibid. f. 383.*

**S**incera virtus Deo innotescere gestit, non homini; latebras potius quærit quàm publicum; Dei, qui videt in abscondito, non hominum oculos requirit, teste contenta conscientia

Qui vult decipi, statuatur ab externis iudicium. Heu quoties ludimus, & ludimur! hy-  
po-

pocrisi ludimus alios; externa pietatis specie contenti, quòd vivamus, ludimur ipsi.

Cortice delectamur, medullam negligimus O! præposterarum hominum curas! quæ in exterioris culturam impenduntur omnes, vix ulla extenditur ad interiora. Nemo amentiùs delinquit, quàm qui se neglecto, curat opinionem sui.

Omne hominis pretium anima, omnis huius decor virtus est, hanc qui non excolit, turpis est, licet Adonidem forma superet; quæ latent pretiosiora sunt iis, quæ patent.

## XXVI. MAJI.

*Impugnaturus hominem demon primùm circumspicit, qua parte debilior, quæve neglectior sit: eò machinas admovet, illic impressionem facit.* S. Ignat. apud Bart. l. 4. f. 328.

**M**aximum ad vitam bonam compendium est sui notitia Sæpe hostem persequimur, qui parùm nocet; interea capitalis, quia latet ignotus, in mala nostra tutò grassatur.

Andabatarum more cæcus pugnat, qui, quem ferire hostem debeat, non intelligit, ictum vibrat incertum certo sui periculo, nullo fructu.

Imbellis in nos dæmon esset, nisi fœdus cum cognatis vitiis iniret; his nos suppetiis expugnat. Huc igitur conatus, huc arma:

si vitia nostra subigantur, non est, quod or-  
cum metuamus.

Si nos in animæ nostræ lucra ita vigiles ef-  
semus, ut hostis est in detrimenta, quam citò,  
quamque facilè sancti essemus. Primus huc  
gradus est, passionum suarum principem &  
nôsse, & persequi.

## XXVII. MAJI.

*Quæ retro sunt, quæso, in gratiam Jesu Chri-  
obliviscimini, & quasi nunc primo tam lon-  
gum iter susciperetis virtutis viam inde-  
fesso progressu alacriter metimini. S. Ig.  
ep. ad Hisp.*

**U**T friget focus, quem non quotidianus  
ignis accendit, sic pronum est ad natu-  
ram redire vitia, nisi quotidiana iis domandis  
insudet diligentia. Sol quotidie cursum in-  
choat, virtutis quoque semita novo in dies  
passu est auspicanda.

Cur negemus animæ, quod tam solerti cura  
præstamus corpori? hujus imbecillitatem  
novo quotidie alimento confortamus; suum  
etiam illi debetur nutrimentum. Nisi ole-  
um affundas, lumen & flamma deficient.

Quidquid spiritualis thesauri longior cu-  
ra cumulavit, facilè omnem dies unus disti-  
pabit; nisi dies omnis foveat industriam.  
Quid prodesset vicisse toties, si semel suc-  
cumbas.

Non bene finiet, qui non quotidie incipit.

Quo-



Quotidie potest malè agi, vel ideo egregia animi ferventis decreta quotidie promulganda sunt cordi, eique inclamandum: vive hodie!

## XXVIII. MAJI.

*Certum est pigros, quòd se ipsos non vincant, nec ad animi pacem, nec ad perfectam unquam virtutis possessionem venire, cum tamen diligentes utrumque paucis diebus facile consequantur. S. Ig. ep. ad Hisp.*

**Q**uidquid bellorum, & molestiarum patimur, intra nos est. Frustra dissidiorum causas, & perturbatæ pacis fontes alibi quærimus, aut querimur; domi est scaturigo.

Quisque suæ fortunæ, quia quisque suæ pacis faber est; externa bella domesticæ paci nihil officient, nisi tu ea velis admittere, nunquam usque ad animam penetrabunt, minùs cor ferient.

Mira res! verbum, quod te vulnerat acutissimè, nullum alteri sensum movet. Idem, qui te sternit casus, alium nihil commovet; nempe quidquid recipitur, per modum recipientis recipitur. Cur affligeris?

Tua, non aliorum culpa hæc acciderunt, quæcunque animi tui pacem everterunt. De manibus tuis sortes tuæ.

## XXIX. MAJI.

*Si in bello generosus miles pugnât, ut furilem gloriam & exuvias colligat, quàm vos, ut*

*de vobis victoria strenuè parta æternam gloriam in cælesti regno consecuti triumphetis, Christi militum nec nomen, nec animos impletis. S. Ig. ibid.*

**N**on est monstrum turpius, quàm nomen habere militis, & animos fœminæ; galeatus nempe lepus risum meretur, non gloriam, colo dignior, quàm arena.

Quò generosior Dux est, tantò minùs tolerabile ignavum sub ejus labaro militem agere. Cui tu militas? vide: nisi generositatem induis, aut nomen, aut mores muta.

Si militia est vita hominis, cur ignavus stertis? cur ad difficultatem, & vel ad suspicionem vulneris impallefcis? non est hoc pugnare, sed otio & inertia diffluere.

Turpe est gaudere velle stipendiis, & nolle vigiliis obire: turpius æterna sperare, & modici temporis labori se subducere.

## XXX MAJI

*Illos in celo pretiosissima coronà manet, qui opera sua omni, qua possunt, agunt diligentia, nec enim sufficit opera per se bona facere, sed beneficere S. Ignat. apud Nolare,*

**A**liud est bona facere, aliud bonum effici: nec enim quia bona feceris, continuò factus es bonus, nisi bene eadem feceris. Bona, & non bene facere, idem est ac characteres, quos formas, litura obliterare.

Opus commendat artificem. Vel linea plus

plūs valet Apellis, quàm mille imagines alterius, qui tabulæ colores illinere contentus, quos, non quomodo pingat, observat. Tu pingis æternitati.

Ponderantur in schola virtutis actus, non numerantur. Forma dat esse rei, non materia. Non tam quid muneris, quàm quomodo agas, te commendet.

Bene facere, est rem ad legum amussim facere; suo rem quamque tempore & modo facere; à neutro vel latum unguem discedere. Sic qui agit, multùm facit, esto non multa.

## XXXI. MAJI.

*Præter omnia velim unumquemque vestrum cum zelo gloriae Dei, proximorumque salutis, Jesu Christi Salvatoris nostri puro, & sincero amore lucere.* S. Ig. Epist. de perf.

**M**ilnus te est, quidquid amas; infra tuam descendis dignitatem, quoties aliquid præter Deum amas; omne enim illud terra est, aut sub terra natum, quibus te præposuit natura turpiter infra illa tua te abjicit concupiscentia.

Licet omne aurum, quod ars hætenus, aut natura produxit, amore mercari posses, tanti emendum non esset; plūs amor valet, quàm omnes thesauri.

Si creatis amorem tribuas, te perdis; quia das non recuperaturus, das non reddituris; qui horum semel amore illaqueatus hæret,

egenus est maximè, quis enim egentior, quàm sui?

Sinè corde sunt ista, quæ amas, non redamant. Ibi tuus figatur amor, unde reciprocum sperare possis, eumque sincerum unum, & sempiternum; quem extra Deum non invenies.

## I. JUNII.

*Ad quem finem vocati estis, ad eum infractis animis enitimini, cum tot ejus causa vobis à Deo auxilia, & instrumenta suppetant.*

S. Ignat. apud Bart. l. 4. 328.

**I**nnumeras habet gratias vocatio pedisse-quas, seriem illarum huic Deus alligavit. Ut annulum annulus in catena, sic gratiam gratia in vocatione excipit. Dum tamen augmentur dona, rationes etiam augmentur donorum.

Multis obæratum multum debet. Cave, nè multitudine obruaris, & ipsa Dei liberalitas te miserum efficiat; quantò amplius accepisti, tantò arctius habes vinculum, es in ære alieno. Vide quæ solvas.

Sublimis est finis tibi à Deo constitutus, nec minora tamen ei assequendo præsidia; ita hæc ad illum dirigenda, ut magna sinè magno conatu obtineri non posse memineris.

Nec pericula hæc nec difficultates metue; & hæc, & illa gratia vocationis imminuet, tibi

bique vires addet, ut ubi naufragium pateretur alius, te vocatio seruet incolumem.

## II. JUNII.

*Quanta illorum paucitas, qui sanguinis Jesu pretio ad salutem utantur? S. Ignat. ibid.*

**C**adit asinus, est, qui subleuet, & si cadat anima, quis ei levandæ manum admoveat? sic pretium sanguinis Christi, sic infiniti valoris merces contemnitur!

Nummus perditus quanta cura quæritur, & si gratia Dei pereat, quàm rarus ulla sollicitudine tangitur, cujus tamen minimus etiam gradus omnes totius orbis thesauros pretio longissimè antecedit.

Christi sanguis in totius orbis pretium datus est, & tamen (O! quàm vera, tam lacrymabilis cogitatio!) pauci sunt, quibus prodest ad salutem. Multi vocati! pauci electi!

Christi plùs, quàm Abel justus, sanguis clamat de terra vindictam. Sic, qui fusus est in salutem, convertitur in ruinam, & redemptionis pretium, sit perditionis argumentum.

## III. JUNII.

*Nec duntaxat invicem vos perpetuò diligere, & amare debetis, sed amorem illum in omnes communicare. S. Ig. ibid. f. 331.*

**S**i vera charitas est, vel sol sit in universo, vel punctum in circulo: ex hoc rectæ ad universa circuli puncta ducuntur lineæ; ille lucere, & prodesse pari luce conatur omnibus.

Omnibus debitores sumus, ut omnibus omnia fiamus. Nec id quidem ad speciem solum, hoc enim non amare est, sed adulari, non prodesse, sed decipere velle; indignum humana societate vitium!

Magneticum hoc amoris arcanum est, ut qui amat omnes, pariter ab omnibus redametur. Echo nempe charitas est, reddit, quem accipit affectum. Hæc sola justa est humanos favores aucupandi via.

Imitatores ejus simus, qui ut charitatem nos doceret, pro uno non magis, quam pro omnibus mortuus. Partiales affectus sunt odiorum semina.

#### IV. JUNII.

*Paucissimi sunt, qui intelligant, quid illis Deus faceret, si totos se ei permitterent. S. Ig. ibid. §. 36.*

**I**ncertæ sunt providentiæ nostræ, & myopes oculi, pauca cernunt, pauciora discernunt; alius proinde oculus nos regere, alia de nobis providentia disponere debet, ea nempe, quam nihil latet.

Periculosa plenum opus est alex, Divinæ se dispositioni subducere. Fugit Jonas, & naufragium subit. Nemo periret, nisi Dei ductum aspernaretur.

Si cæcus cæcum ducat, ambo in foveam cadunt, ubi cæca voluntas ab excæcatis passione affectibus raptatur, quid restat, nisi præcipitium?  
Ille

Ille alio felicior, qui Dei voluntatem certioribus novit iudiciis, hanc dum sequitur, via regia graditur ad felicitatem; errare nefcius, dum ab eo regitur, qui est via, veritas, & vita.

## V. JUNII.

*Qui invitati, ac dissentientes, actu tamen iussa præsidum exequuntur, inter vilissima mancipia sunt numerandi. S. Ignat. ap. Mass. l. 3. c. 7.*

**H**onesta, & generosa indoles calcaribus non eget; facillimo ductu ad virtutem omnem impellitur; dura contra, & illiberalis, etiam mille verbis, aut verberibus vix compelli se finit.

Tarditas, & mora multum gratiæ demit uti beneficiis, ita & obedientiæ. Si enim hilarem datorem diligit Deus, morosum utique aspernabitur. Age, quod agendum est, sed age promptè.

Quæ coacta sunt, nec accepta, nec durabilia esse possunt. Dura non expectat, humano nutu contentus, qui infra homines abjectus non est.

Quantum onus imponit superiori morosus obediens! facilius ipse opus peraget, quam imponat; si videt lapidem se citius, quam subditum ad iussa moturum.

## VI. JUNII.

*Sicut viribus corporis, & animi abusi sumus, ut contra Dei legem faceremus; ita recuperata per pœnitentiã gratia, iisdem viribus ad vitæ emendationem utamur. S. Ig. ap. Orland. p. 1. l. 5. n. 7.*

**P**AR pari reddere, lex est justitiæ; qui minus, quàm debeat, dedit, legem non implevit. Heu me! in quanto debitores sumus, & quàm segnes in exolvendo.

Unius peccati malitiæ vita, imò æternitas non sufficit expiandæ, & ubi injuriæ compensatio? ubi pro remissa culpa gratitudo? ubi pro pœna satisfactio? non intres in iudicium cum servo tuo Deus.

Dignissimum est, ut quæ fuerunt media ad iniquitatem, fiant ad sanitatem instrumenta, & membra, quæ vitiis serviverunt, virtutis exercitio addicantur.

Corpus magis reum sit, an anima, frustra disceptas, par utrumque culpa complectitur, eadem manet pœna, nisi par utramque expies pœnitentiã.

## VII. JUNII.

*Ut omnes lucrifaciat sapiens hominum piscator, omnibus attemperare se debet, licet minor conatui fructus respondeat. S. Ig. in vita l. 5. c. 11.*

**I**N magnis etiam voluisse, laudem meretur, licet infra intentionem sit successus. **Ex**  
co-



conatu, non ex eventu meritum nobis expectandum. Ille quippe solus in nostra, hic in unius Dei, est potestate.

Illa Dei erga nos liberalitas est, ut inopiæ nostræ conscius nihil à nobis exigat, præter bonam voluntatem, reliqua in se assumit. Unde, qui fecit, quod potuit, legem implevit.

Etiam in rebus opinione nostra optimis, si spes, & labores nostri cadant irrii, credere debemus, esse melius aliquid, quod licet nobis incognitum sit, satis est esse illi in aperto, cui nihil absconditum.

Si tua intentio effectu careat, subtrahitur tibi non occasio meriti, sed vanitatis, hujus locò materia tibi offertur patientiæ, aperitur campus adorandi judicis Dei. Vide, quanta bona in bono non obtento! fac quod potes. Deus supplebit ea, quæ non potes.

## VIII. JUNII.

*Ubi secundo cursu fluunt omnia, suspicio sit, an non illic parùm felix sit Divini obsequii cursus!* S. Ignat. ibid.

**N**imia maris tranquillitas navigantibus sollet esse suspecta; diuturna quippe malicia graviorum prodroma est tempestatum. Non bene res agitur, ubi bene semper agi videtur.

Prosperitas nimia seducit ad vecordiam, tollit metum periculi, facit incautos, hostium exponit insidiis, sui creat fiduciam, & quid

quid hac felicitate infelicius? latet anguis in herba.

Navicula Petri luctatur cum fluctibus. Inter adversitates crescit Ecclesia; sanguis Martyrum semen esse debuit Christianorum: ita bona non fiunt, nisi renitentibus malis.

Ut sine vulnere non germinant vites, sine vomere non speratur messis, nec ignis in flammam assurgit, nisi flabris, & venti concussa, sic languet sine adversario virtus, nec est meritum, ubi deest difficultas.

IX. JUNII.

*Mos spontaneæ mortificationis palam extra ordinem susceptæ utiliter prohibetur: tum ut meminerint præstare victimis obedientiam, tum nè se inaniter efferant.* S. Ig. in Hist. Soc. p. 1. l. 11. n. 6.

**S**I triumphus concedatur in minoribus, deest stimulus ad majora. Inter ea, quæ vincenda veniunt, principatum tenet voluntas. Capite mali sublato, reliqua facilius vincuntur.

Mortificationes, quæ plus habent strepitus, minus ponderis, speciem habent æstimationis, sed sub iis intacta manent vitia, gaudentque se præteritis in leviora conatus absumi. Radix malorum est castiganda.

Quæ præter ordinem assumuntur, suspecta sunt; maximè si leviori manu peragantur, quæ communia debent esse singulis; tum enim

enim certum habe, sub extraordinariorum pallio vel hypocrifim, vel vitium aliud latitare.

Nulla tutior ad virtutem via, quàm ordinaria. Hanc trivere tot Antecessores, monftrat Regula, dictavit Spiritus Sanctus; ab hac, qui recedit, accedit ad errores.

## X. JUNII.

*Iisdem contra demonem utendum est armis ad salutem, quibus ille abutitur ad noftram perniciem. S. Ig. in Hift. Soc. l. 3 n. 48.*

**T**Alio reddendus est orco, ut confufum redire pudeat ad certamen; dolos, quos in noftri ruinam fabricat, ipfe fentiat. Si arrogantia tentet, fubmiffione occurrendum.

Si mille illi fint nocendi artes, totidem nobis refiftendi nova funt præfidia, nihil eft, quod metuamus, iis ipsis, quæ contra nos acuit, telis vinci potest, modò iis uti fciamus.

Inclinationes noftras habet ille in fua confilia, & noftra damna fœderatas, his agit adjutricibus, quidquid in nos proficit. Si verò eas nos fub jugum rationis miffas virtuti fervire cogamus, heu! quantum ingemit dæmon, & exarmatur.

Adcò nempe imbellis eft dæmon, ut, nifi nos arma illi miniftramus, nihil adverfum nos moliri poffit. Vitia noftra fervient nobis ad triumphos, fi ea victoriæ noftræ materiam ftatuamus.

## XI. JUNII.

*Quos natura bonitas ad amplam fortunam in seculo erat proventura, hi quoque in Dei gloria strenuè proferenda successus habent uberiores.* S. Ig. ap. Barr. l. i. c. 1.

**D**etestanda parentum avaritia, qui filios Religioni, divinoque cultui destinant, quos vel deformes, vel stupidos suis natura donis destituit. Hoc nempe est cum Caino deteriora Deo offerre in holocaustum.

Optima debentur Optimo. Non gratiam, sed indignationem relaturus, quisquis mancum, aut cœcum immolaverit holocaustum. Maximus divinæ Majestatis contemptus est, vilibus coli.

Liberalis Deus est, sed in liberales. Nihil familiæ splendori decedet, licet natorum optimus Numini consecratur. Sic perdere lucrum est, nec enim deerunt Deo media, nec bonitas, ut acceptum cum fœnore reddat.

Sacrilegi proventuum Ecclesiasticorum depeculatores sunt, qui ministrari, non ministrare, saginari de altari optant, non sanctificari; lanam, non oves, se, non Deum quarunt. Et quod his præmium? imò quæ tales pœna excipiet?

## XII. JUNII.

*Tempestas absque nostra culpa in nos sevens, est quedam futuri, & secuturi brevi proventus significatio.* S. Ig. in Hist. Soc. p. 1.

**D**Um gravissima sævit tempestas, ibi proxima imminet serenitas, ubi supremas in nos vires exeruerit invidia, ibi fessâ conquietet. In spe sit fortitudo tua.

Omne momentum nostræ felicitatis patientia est, magnum domesticæ pacis Sacramentum, asylum securitatis, præco & caduceus felicitatis. Feramus patienter, quæ mutare non possumus.

Quemadmodum nihil frequentius, quàm pati, nihil pariter magis necessarium patientia. Hæc commune malorum omnium medicamentum, qua velut dictamno cervi, expellimus aciem, ferrumque malorum.

Nec minimam artem puta patientiæ. Compendio quodam se à dolore & suppliciis tam vitæ, quàm hostium liberat, qui pati novit. Invulnerabilis animus sola sit patientia. Meliora spera.

## XIII. JUNII.

*Persecutio flabellum est, quo virtus nostra excitetur; si illa, quod absit, deficiat, marcescet inde, nec vitè munere suo perfungetur.*

S. Ig. ap. Corn. à lap. in Prophet. maj. c. 13.

**P**ersecutio, quantò insistit gravior, tantò nos in virtute solidiores facit, non secùs, ac validiores venti urgent arborem, ut profundiores in terram radices mittat. Illa nempe sollicitos nos facit, nè in nobis inveniatur aliquid, quod jure persecutionem mereatur.

Con-

Continuus hominum favor, & communis applausus facilè animum inflat, & immemorem facit officii. Bonum mihi Domine! quia humiliasti me.

Dum nos odit mundus, maximè benefacit, dat enim occasionem meriti, virtutis exercitium: causam offert, nè augetur, ut despicatur.

Si nulla nobis in hominibus spes, cogimur omnem in Deum transferre: illis dum nos displicere advertimus, monemur, ut Dei favores conemur promereri.

#### XIV. JUNII.

*Domine, ecquid ego volo? aut quid velle possum extra te? S. Ig. ap. Ribad. l. 5. c. 1.*

**C**or hominis parvulum est, magna tamen desiderare potest. Votis ejus mundus totus non sufficit; capacem quippe Dei animum, quidquid Deo minus est, non explebit.

Fluxa omnia, & instabilia sunt, nisi cor immobili affixeris, continuò fluctuabis. Anchoram fige in Deo. Fige per fidem, fige per spem, fige per charitatem. Funiculus iste triplex nunquam rumpetur.

Illa sola beata est voluntas, quæ habet quidquid vult; quod in manu cordis nostri est, nemo potest eripere, alia omnia fortunæ subjecta sunt. Deum si amas, nemo tibi thesaurum eripere potest.

Si quærenti regnum Dei, reliqua omnia  
ad-

adjicientur, quid deesse poterit Deum querenti? cum hoc, nihil habendo, satiari poteris, sine hoc, omnia habendo, adhuc egebis.

## XV. JUNII.

*Qui voluntate solum obediunt, repugnantem ratione, uno tantum pede in Religione versantur.* S. Ignat. apud Mass.

**P**ericulosa statio, uni tantum ibi pedi insistere, unde facilis ad ruinam impulsus. In edito stas, toto mundo superior, unus flatus sufficit, ut deserta statione infelix stylita concidas.

Ubi domestica vigent diffidia, diu non stabit respublica: ita dum voluntas discedit à judicio, nec constantia expectari potest operis, nec successus. Ratio, & voluntas sorores sunt, mutui auxilii ita indigæ, ut neutra sine altera ad virtutem eluctari possit.

Dum ratio, & voluntas mutuum bellum foveant, una subruit alteram à profectu, dum tonatur una, revocat altera; ita fit, ut nec una, nec altera obedientiæ præmium obtineat.

Quod Deo in nobis placere potest, judicii est promptitudo, sine qua mortua est obedientia, & licet moveri ad imperata videatur, cadaver est, anima caret, à qua vitam, & vigorem capere debuisset.

## XVI. JUNII.

*Cum intimo, maximoque dolore videte, in quanta ubique gentium ignorantia Deus versetur.* S. Ig. ap. Bart. l. 4.

Heu

**H**eu quanta in Dei agnitione caligo! noctuæ vivimus, æternæ lucis ignaræ! tenebras nobis non tam mysterii sublimitas, quam negligentia nostræ veterum affundit.

Quot non anni rerum creaturarum cognitioni tribuuntur, atteruntur vires, ætas impenditur, ut sciamus nocitura, & in discenda sanctorum scientia, in consequenda Dei cognitione nec tempus est, nec labor.

O vana hominum studia! ut opes, ut aliquis honoris gradus, ut hominum notitia obtineatur, quæ curæ? quanti conatus? & quis est, qui recogitet corde, quid Deo debeat?

Sedent in tenebris, & in umbra mortis tot hominum millia, in tenebras æternas ruitura, nisi tu iis facem accendas, qua duce ad cognitionem Dei, ad veræ fidei lumen adducantur. Quid moraris?

XVII. JUNII.

*Omni contentione laborandum, ut id, quod sequimur, assequamur, & perfectionis viam ingressi, perveniamus ad id, quod perfectissimum est. S. Ig. ap Lancic.*

**M**ulti, cum bene cœperint, malè consummarunt, dedecore digniores, quam elogio: quòd vel majora viribus cœperint, malè providi, vel bene cœpta turpi defectione deseruerint.

In littore canitur celeusma. Quid juvat  
forti lacerto sulcare maria, fluctus scindere,  
cha-



charybdes arte omni vitare, si nunquam detur designato littore frui.

Inconstantis animi est, multa inchoare. Unitate præstat impendere, donec plenè consequaris intentum. Assèquitur nulla, qui sequitur plura. Porrò unum est necessarium. Quid juvat Christum sequi, si non consequaris.

## XVIII. JUNII.

*Nulla est bestia super terram demone effera-  
tior, acrior, & pertinacior in hominem, ut  
cum pernicie nostra, malignæ, obstinataque  
mentis suæ desiderium adimpleat. S. Ignat.  
de spir. dignit.*

**S**I cecidit de cælo Angelus, ex Apostolatu Judas, quis est, qui stare sine justo timore audeat? nec Salomone doctior, nec Davide sanctior es, nec Petro meliùs instructus, & necdum times?

Nullus adèò sanctus, aut in virtute probatus est, qui timoris expers vivere possit. Respice columnas cæli, contremiscunt illæ; suscipe stellas, de cælo ceciderunt.

Vide naturæ tuæ in peccato conceptæ fragilitatē, hostis tui partes in omnes vigilis industriam attende. Numera, si potes, lapsuum occasiones tristes, te meliorem minùs cogita; sic in timore, & tremore salutem tuam operare.

Initium sapientiæ timor Domini, sinè quo malè tutos in via virtutis gressus figimus, vel enim in superbiam incidimus, vel in socordiã.

*Cum nullo mortalium licet pessimo, de rebus Dei sermo miscetur, quin plurimum inde lucri referatur. S. Ig. apud Nad. 31. Julii.*

**M**agna vis est gratia! momentum sufficit, & è Saulo Apostolum, è pessimo efficit sanctissimum. Sic nempe lux illata orbi, momento tenebras omnes expellit.

Unica vox gladio ancipiti penetrabilior ita pervadit animum, ut totum immutet. Brevis sermo longa oratione multò fit efficacior, quando illius affulget radius, in cujus manu corda sunt omnium.

Si fructus non statim appareat, non despera; in fructum maturescet; semen nunc jecisse sufficiat, seges erit, & optima messis, licet nunc alta nive sepulta rigere omnia videntur. Non omnia simul maturescunt.

Utinam plures ad nos venirent, ut fiant sanctiores, non ut redeant spebus suis ditiores. Nostrium est sequiora illorum consilia corrigere, ut meliora referant, quàm quæsierint.

*Nunquam tantis aures ditandæ sunt promissis, quin facta valeant ipsis ex æquo respondere S. Ignat. ap. Bart. l. 4. f. 231.*

**N**on promittendum, quod nolis; minus, quod non possis explere. Fide semel remissa, nihil superest, quod perdas. Vilescit autoritas, imò humana societas cessat.

Unam tantùm linguam natura, & manus dedit binas, ut doceret liberaliores nos esse debere opere, quàm lingua.

Fides tua fidibus conveniat, hæ ut gratae sint, manus facit. Dare quidem pollicita difficilius est, quàm danda polliceri; præstat tamen spem non facere, quàm implere nequeas, nè vel fraudium, vel inconstantia te reum agas.

Si quid negari debeat, ita blandè fiat, nè bis animus vulneretur, negatione, & ejus modo. Sæpè negatio beneficii loco accipietur, si animum quidem promptum, rem verò petitam ostendat noxiam fore.

## XXI. JUNII.

*Nimum alienorum defectum odium plus alienationis animi gignit, quàm emendationis: juvatque ad fugandos potiùs alios, quàm juvandos. S. Ig. in Comp. vitæ.*

**S**æpe defectus graviore defectu corrigimus, dum propriæ passioni nimium indulgemus; unde fit, ut non tam illos emendatos, quàm indignationi nostræ satisfactum, cupiamus.

Quis medicum vocet, qui ægro indignetur, & hunc potiùs, quàm ægritudinem persequatur. Gravior ægritudo majori digna est compassione, affectu magis tractanda, quàm odio.

Inconsideratus nos zelus eò persæpè adducit, ut dum domesticæ consultum volumus di-

sciplinæ, charitatis obliviscamur, id est, curamus corticem, & medullam prodigimus.

Fratri, quantumvis reo, nemo indignatur, nisi, qui domi suæ talpa proprios errores non videt. In multis offendimus omnes, & quæ tua errata tractari velles! satius est bonitate peccare, quàm severitate.

XXII. JUNII.

*In afflictionum genere præferendæ sunt illæ, quæ sensum inferunt acriorem, sed damnum levius: his enim corpus & molestius, & durabilius affligitur.* S. Ignat. in vita apud Mass.

**M**ortificationi mensuram prudentia statuat, nè quid nimis, nè quid justo minùs fiat: hujus amor proprius, illius periculum impetus fervoris facit.

Afflictionum corporalium finis sensus est corporis, non detrimentum: plùs facit, qui diutiùs: excessus cum constantia conjungi nequit, qui se multùm vult mortificare, moderatè castiget, ista durant.

Satius est, sæpius, & per intervalla, quàm graviùs, & sine requie corpus macerare; si continua sit, sensum obtundit, ab assuetis enim non fit passio: si gravior, tum succumbit asinus sub onere.

Etiam culicum morsus martyrii palmam mereri possunt, non semper opus est sanguinis profluvio, aut membrorum laniena.

XXIII.

## XXIII. JUNII.

*Nihil agendum, aut scribendum, unde rancor,  
aut amaror aliquis nasci possit. S. Ig. ibid.*

**N**emini danda est justa offensæ causa. Ne-  
mo tam pusillus, aut vilis, qui obesse  
non possit. Et muscis sua bilis, & culici acule-  
us est, qui sensum faciat, & tumorem creet.

Quæ scribuntur, severiorem vocanda sunt  
sub censuram, per manus, & oculos eunt, æ-  
tatem ferunt, plures, & gravius ferunt. Lit-  
tera scripta manet irrevocabilis. Sit sine fel-  
le, sine aculeo quidquid scribis.

Etiam ubi correctione opus est, ea esse de-  
bet sine amarore, sed sicut medicinas auro,  
vel saccharite condit medicus, sic ea tempe-  
randa est, ut non correptio, sed medela, non  
pœna, sed beneficium esse agnoscat.

Neminem ad bonam frugem revocabi-  
mus, nisi animum prius, quàm vitia expugne-  
mus; lucrabitur autem neminem, nisi credi-  
derit se amari.

## XXIV. JUNII.

*Magnum demoni gaudium est, anima incon-  
sultò procedens, sine fræno illius, à quo re-  
gi deberet; quantò enim telis altiùs eniti-  
tur, tantò gravius ruet. S. Ig. apud Nol.*

**N**emo certiùs labitur, quàm qui se credit  
esse securissimum: ignorantia periculi  
summum est periculum: incauta securitas

via est ad præcipitium, quò quàm facile est ruere, tam difficile inde redire.

Alieno ductu qui graditur, securiùs procedit. Plures oculi plura vident, & prævident. Væ soli! quia cùm ceciderit, non habet sublevantem se

Nemo suo, etiam in optimis, nitatur arbitrio; cùm sæpe ex optimis, si degenerant, fiant pessima. Qui suæ virtuti fidit, nullam habet.

Alta semper periculis obnoxia Vertiginem time, qui de se submissè sentit, hanc facillè cavet. Præfidentia temeritatis mater est pedissequam trahens ruinam.

XXV. JUNII.

*Oportet parùm loqui, & multùm audire. S.*

Ignat. apud Bart. l. 4.

**P**ER verba effunditur animus, vox genium prodit, hac ministra cordis patent intima, quæ tamen ità recondita volebat esse natura, ut nec Momo fenestrellam, eò indulserit.

Multiloquio prodigitur authoritas, qui tacens Philosophus mansisset, loquens omnem sui opinionem diluit: majora quippe animo volvi quisque credidisset, si prudenti silentio, velut sipario involuta mansissent, quæ inconsulta lingua profudit.

Ubi verborum est flumen, ibi vix gutta mentis. Prudens multa loqui non potest, quia prævidet, quàm grandes vox levicula ciere possit tempestates.

Nec

Nec aliquid est honorificum magis, quàm verborum parsimonia. Etiam fatuus, quàm diu tacet, sapientem simulat. Naturam æmulemur, duas homini aures, easque semper apertas; linguam unicam, eamque tot absconditam repagulis dedit.

## XXVI. JUNII.

*Qui Deum secum fert in corde, circumfert secum paradisum.* S. Ig. in compend. vitæ.

**S**olus Dei amor sinceræ fons est lætitiæ, sine ullius admixtione fuci limpidissimus, absque ullius cessationis periculo perpetuus. Quid fodimus nobis cisternas dissipatas?

Si dilectionis pactum cum Deo ineas, non est, quòd de felicitatis constantia dubites? cuius nec amor perire, nec ipse potest. Nequit leviter voluntatem mutare, nec mutari. Nulla subit illum amantes amandi pœnitentia.

Alius amor semper inconstans est; potest enim amatus vel invitus cessare ab amore tui; potest ipse perire, licet amor in vivente periturus non fuisset. Felicitas non est, quæ perpetua non est.

Pacta dissolvi alia possunt, quoniam eadem voluntate, qua fiunt, rescindi possunt; in amoris autem contractu, cum eadem voluntas materia sit contractus, voluntas alienatur, jam non sui Domina, jus pœnitentis amittit.

## XXVII JUNII

*Compendiosissima, & ferè sola ad sanctitatem*

*via est, abhorrere ab omnibus, quæ mundus amat, & amplectitur* S. Ig. in Exam c. 4.

**Q**ua vetus Romani Sapientis querela fuit, eadem hodie est virtutis: malorum causas esse, quòd exemplis, non ratione componamur. Vivimus, ut passim vivitur.

Non quòd itur, sed quòd eundem sit, attendit, qui tendit ad perfectionem; ille peritum se nauclerum probat, qui etiam contra torrentem niti novit.

Noli sapere cum vulgo, nec continuò imitandum credas, quod popularis æstimatio suadet, quasi verò vitium non sit, quidquid multorum exempla excusant. Æstimanda sunt iudicia, non numeranda.

Documento aliena vitia sint ad cautelam, non incitamento ad sequelam. Qui malis dissimilis esse veretur, evadit malus. Pauci sunt, imò unus Dei Filius, cujus exempla pro regula morum assumantur.

### XXVIII JUNII.

*Mensura profectus ex vultu, gestibus, naturæ facilitate, aut amore solitudinis malè sumitur, cum à vi, quam sibi quisque infert, sit desumenda* S. Ig. ap. Mass.

**I**gnava sanctitas est, quæ laudem captat ex iis, quæ plus stupor quidam naturæ, quàm virtus operatur. Nisi tu etiam lignum sanctum esse dicas, quod nec ira unquam, nec libidine commovetur.





703587 **Bibliotheca** 300zł.  
**P.P. Camaldulensium in Bielany**

Depozyt w Bibliotece Jagiellońskiej



07825

A.I. 14



Fragment of a patterned fabric label with red and black geometric designs, partially obscured by a piece of aged, light-colored paper.

Fragment of a white paper label featuring a ruler scale with markings in centimeters and millimeters.